

同安縣志

卷二十

二十一

人物名宦忠烈
人物循績武功

同安縣志卷之二十

人物

古稱不朽者三立功立德立言同邑向稱海邦
鄒魯文物聲名通於上國自宋迄今學問事功
文章氣節代有其人况爲朱子過化之區士君
子服習詩書敦尙禮義賢才奮興彬彬日盛其
閒理學經濟忠烈孝友以及勲猷懋著懿行昭
垂者悉載於編以仰副

聖天子作人之雅化也夫志人物

名臣

蘇頌

吳燧

林希元

楊逢春

傅鎮

劉存德

洪朝選

陳道基

李獻可

蔡守愚

蔡復一

張廷拱

林一柱

林鈺

宋蘇頌字子容紳子登慶歷二年進士第知江寧建

業承李氏後稅賦無藝每發斂高下出吏手頌因

治訊他事互問民鄰里丁產得其詳及定戶籍民

自占不實者頌曰汝有某丁某產何不言民皆駭

服不敢隱遂剔蠹成賦簡而易行諸令視以爲法

至領其民拜庭下以謝民有忿爭諭以鄉黨宜親

善往往謝去或半途思其言而止調南京畱守歐

陽修委以政曰子容處事精密一經閱覽吾可無

省矣時杜衍老居睢陽見頌深器之曰如君直所

謂不可得而親疏者皇祐五年召試館閣校勘同

知太常禮院議立郭皇后神御殿專謂郭后無可
廢之罪仁宗有不當廢之悔宜耐郭后於后廟而
加一懷哀愍之諡庶不爲逼曾公亮深歎服之遷
集賢校理富弼與韓琦爲相同表其廉退知潁州
仁宗山陵調發倉猝爲度土產有無高估緩期官
自爲市民不知擾而課最他郡潁人德之通判趙
志忠本邊徼降者頌待以禮志忠感泣曰平生誠
服惟公與韓魏公耳歷擢知制誥判審刑院有知

金州張仲宣坐枉法贓論死法官援例杖黥頌奏

免之改流海外遂爲定例進銀臺司知審刑院時
王安石用事以李定爲御史宋敏求知制誥封還
詞頭復下頌當制頌報奏不具草次至李大臨亦
封還於是並落知制誥歸工部郎中班時稱熙寧
三舍人歲餘出知婺州方泝桐廬江水暴迅舟橫
欲覆母在舟中幾溺矣頌哀號祈籲舟忽自正母
甫及岸舟乃覆人以純孝所感徙亳州加集賢學
士知應天府呂惠卿嘗語人曰子容吾鄉先進苟
一詣我執政可得也頌聞微哂而已凡更三赦大

臨還侍從願僅授祕書監知通進銀臺司吳越饑
選知杭州有百餘人遮道訴轉運司責逋市易緡
錢晝繫公庭夜禁廂院死無可償願曰吾今釋汝
使汝營生期以歲月衣食之餘悉以償官可乎皆
曰不敢負于是盡縱之去轉運使怒欲奏願沮法
而縱者乃先期還逋遂不敢言一日宴于郡治堂
聞將兵給集謀害官吏郡人喧傳不安願談笑自
如密諭搏爲首者械送獄中治夜會散而坐客不
知也召修英宗仁宗兩朝正史轉右諫議大夫使

契丹遇冬至其國歷後宋歷一日北人問孰爲是

頌曰歷家算術小異遲速不同如亥時節氣交猶

是今夕若踰數刻則屬子時爲明日矣或先或後

各從其方可也北人以爲然使還以奏神宗喜曰

卿所對殊善因問其山川形勝人情嚮背對曰彼

講和日久頗竊中國典章禮義以維持其政上下

相安未有離貳之意昔漢武帝自謂高皇帝遺朕

平城之憂雖久勤征討而匈奴終不服至宣帝呼

韓邪單于稽首稱藩唐自中葉以後河湟陷于吐

蕃憲宗慨然有收復意至宣宗時廼以三關七州
 歸於有司繇此觀之外國叛服不常不繫中國之
 盛衰也頌意蓋有所諷神宗然之元豐初權知開
 封府尋貶祕書監知濠州皆以治獄事被譖罷郡
 未幾知河陽改知滄州入辭帝曰朕知卿久然每
 欲用輒為事奪命也夫卿直道久而自明頌頓首
 謝召判尚書吏兼詳定官制因陞對神宗謂曰契
 丹通好八十餘年盟誓聘使禮幣儀式欲修一書
 俾有考據非卿不可書成帝賜名魯衛信錄元祐

初遷至吏部尚書兼侍讀奏謂人主聰明不可偏

有所嚮惟應以無心則無不治每進讀至弭兵息

民必援引古今以動人主之意既又請別製渾儀

因命頒提舉頌既遠於律歷以吏部令史韓公廉

曉算術有巧思奏用之授以古法爲臺三層上設

渾儀中設渾象下設司辰貫以一機激水轉輪不

假人力時至刻臨則司辰出指星辰躔度所次占

候測驗不差晷刻晝夜晦明皆可推見前此未有

也遷翰林學士承旨五年擢尚書左丞七年拜右

僕射兼中書門下侍郎賈易除知蘓州頌言易在
御史名敢言旣爲司監矣今因赦合反下遷爲州
不可爭論未決諫官楊畏來之劄論其稽留詔命
頌遂上章辭位罷爲觀文殿大學士集禧觀使繼
出知揚州徙河南辭不行告老以中太乙宮使居
京口紹聖四年拜太子少師致仕方頌執政時見
哲宗年幼諸大臣紛紜常曰君長誰任其咎每大
臣奏事但取決宣仁后哲宗有言或無對者惟頌
奏宣仁后必再稟哲宗有宣諭必告諸臣以聽聖

語及貶元祐故臣御史周秩劾頌哲宗曰頌知君
臣之義無輕議此老巖宗立進太子太保累爵趙
郡公卒年八十二詔輟朝二日贈司空理宗朝賜
諡正簡爲相時務使百官守職量能受任杜僥倖
之原戒疆場之臣毋邀功生事議有未妥者毅然
力爭之故當母后垂簾之秋能使元祐之治比隆
嘉祐器局宏遠不與人較短長以禮法自持雖貴
崇奉養如寒士自書契以來經史九流百家之說
至於圖緯律呂星官算法山經草木無所不通工

筆札其蹟雜見鳳墅續法帖中尤明典故朝廷有
制作必取正焉蘓轍謂曰子容博學強識其講說
放失舊聞多得詳實嘗議學校欲博士分經課試
諸生以行藝爲升進之路議貢舉欲先行實而後
文藝去彌封謄錄之法使有司參考其素行必自
州縣始庶幾復鄉舉里選之遺論者趨之祀鄉賢
吳燧字茂新紹定二年進士教授福州改知漳州賊
寇竊發設方略扼要害屬縣以安累遷監察御史

上疏以正紀綱闢言路爲第一義冬雷復論鄭清

之爲執政弗畏天災宜俾奉冊就第而用宦官宮
妾不知名者代之疏入除大理寺卿不拜而去再
歲調爲祕書監入對願絕內降裁私恩聚忠賢抑
嬖倖節不給之費夫不良之牧擢殿中侍御史兼
侍講時盛夏猶寒燧言宜崇陽抑陰洪天錫論董
宋臣等甚力燧請行其言改禮部侍郎未幾奉祠
度宗立召爲兵部侍郎卒燧彈劾數十卷皆通達
國體義形於色薦書數十人盡知名士祀鄉賢

明

林希元字茂貞號次崖正德丙子丁丑聯第進士授
南京大理寺評事世廟登極條上新政八要曰務
正學親正人用舊臣清言路急交修持久大息中
官機務以拔禍根罷中官鎮守以厚邦本又言臺
諫諸臣默默於往時嘒嘒於今日竿瑟混聽菲葑
奚採宜考覈以清言路進士周祚等疏言近來章
奏紛紜無如希元所陳者乞留神省覽見之施行
下所司議議上帝優詔嘉納焉遷寺正是時希元
名動兩都忌者側目會以議獄事忤寺卿陳琳南

京御史戚雄等疏論之降泗州判官泗饑辦賑周

詳青陽滄湖嘯聚九百人單車往諭皆解散且請

貸其罪而賑恤之境內以安復以不屈當路棄官

歸大臣交疏薦之再起寺正擢廣東按察僉事管

鹽屯二政條奏切近四款復以行於泗州者爲荒

政叢言上之帝可其奏通行天下尋改提督學校

其條訓多士務在闡繹經傳敦崇古典劇寇王畿

剽掠廣惠希元署按察篆率府衛兵指授方略卽

時討平御賜白金陞南京大理寺丞上王政疏爲

目二十有一秩滿留內時遼東軍陵辱撫臣希元
抗疏極言姑息之弊忤旨謫欽州知州壤接安南
城郭官舍半鞠墟莽悉心經畫之開誠先物約身
裕用塞弊竇興廢墜遷學育才廣置勸農之吏設
立屯田增修營堡一意教養捍衛會有征安南之
命希元熟究其國中虛實強弱人情向背慨然以
興復爲己任疏六上而奉命大臣圖安靖第受其
納欵請罪希元之說不行陞海北道兼管兵備珠
池朱崖軍民疲困珠盜橫行立條嚴禁一年而民

蘓盜息卒坐安南用兵事與督臣異議以拾遺罷
歸欽人建祠生祀之希元慷慨鯁直有俯視流俗
擔當宇宙之氣而才識亦練達世廟罷鎮守中官
悉歸內監自其一疏啓之而安南歸命還四峒亦
希元之議足以奪其魄焉家居手不釋卷晚年益
究義理精微之極叅訂諸儒所定致知格物之說
附以己見曰更正大學經傳定本所著易經四書
存疑皆足羽翼朱子學者師之又有次崖文集祀
鄉賢又建專祠特祀於 文廟之右

楊逢春字仁甫號西渠少有志氣每論爲人爲學輒以第一流自期嘉靖乙酉舉人已丑進士授仁利令未任丁外艱復補崑山令銳意任事賦籍獄牒胥吏不得竄手縣號富饒而一毫不染吳俗大戶領京運邑令寄書權貴金縑禮物皆大戶爲備逢春獨裁罷之民以此感逢春最深縣賦稅繁且重民力不能給者逢春不忍急之行取至部以錢糧不及緩三牛乃得南京浙江道御史骨鯁獨持痛惡依阿渙澀之習遂抗疏列論兩京九卿大臣之

脂韋者十餘人劾退挾路奔競之濫拜宮僚者一

時風采凜然又陳江北屯田利弊知無不爲巡視

江南倉汰黜貪庸風采振竦擢廣東僉事備兵嶺

南疆界遐曠猺獍蕃育將玩卒惰賊白日剽行旅

逢春首責郡縣修政息民易將選卒指授方略賊

發輒得夜門不閉事無畏難諸所剔蠹甦民雖不

屬已亦毅然任之丁內艱復補四川僉事專管鹽

屯利源所在豪右猾吏穴之爲綜刷成額按籍考

要僞巧無所飾課入日進時敘州戎縣都蠻歲肆

行殺掠邊無居人逢春獨抗言禦取之策撫按會
檄委辦度險阨分兵進剿陽撫其四鄉以剿二鄉
爲師名果得四鄉最傑者四十人以來盡殲之用
是兵入有功俘斬千計擢湖廣叅議分部潭邵之
閒平賦分役節冗興教凡所當爲悉力從之縱有
犯忤不恤也性孝友與其弟不立私財居鄉敬老
字幼不以貴倨鄉人慕悅陞雲南按察副使未升
而卒於湖南民走哭相踵不絕喪歸罷市輿聲以
過出境乃止王慎中爲銘其墓祀鄉賢

傅鎮字國鼎嘉靖戊子舉人壬辰進士由行人授南
京御史疏諫聖駕無數幸山陵帝嘉納之有守璫
潘真挾私亂政陵虐軍士鎮言真不當以嬖倖開
利竇殘朝廷赤子請按真姦贓果有左驗逮治之
已念母病請歸旋補廣東道御史歲辛丑北兵大
掠三晉以西地總督樊繼祖第與諸將帥堅壁自
衛而先後報首功至五百餘級鎮疏其欺罔盛張
功伐實未嘗與敵戰也勘果如其言褫繼祖職武
定侯郭勲獄事下錦衣孫綱推問受賂絳何英等

以脫勲罪有旨覆治鎮坐勲及勲綱交私罪餘分
別寬貸之出按雲南會母卒服除補職巡真定又
巡山東屬妖人謝漢商大常作亂擒獲黨與甚多
郡縣概具獄磔鎮論殺首惡餘脅從者三十餘人
悉放去入署河南道掌計事嚴嵩欲黜觀察使一
人鎮不從憾之出爲河南副使有治河羨金二千
餘悉封識之庫中人指其金曰傅真金從鎮名廉
之也轉廣西叅政浙江右布政遷湖廣左布政鎮
在粵西時有議逐流民者鎮曰彼亦民也况間有

師儒醫卜商賈之屬可裨我民柰何驅之既轄楚
進南有都御史提督操江尋以病乞歸鎮爲御史
凜凜風裁貴戚豪強斂手時目爲傅虎及行法停
讞出於仁恕人多德之敷歷藩臬漸致大位中外
倚重焉萬歷中卒賜祭葬祀鄉賢第鑰

劉存德字至仁號沂東嘉靖丁酉戊戌聯第進士初
授行人持節冊祭益府嗣王雅善修飭自稱勿齋
氏存德因宴爲陳四勿之旨嗣王前席罷宴曰昔
菑川論三仁今大行陳四勿足相方矣贈滿百金

爲治裝亦值百一無所受獨拜持篆書四幅歸旣
報命居三載選浙江道御史會有獻四親廟圖說
請祧孝廟者抗疏力諍世宗震怒擲疏竟以理不
可奪得降俸時亢旱章報卜震雷大雨如注京師
水二尺歡聲動地羣稱劉御史一言回二天云視
兩淮饑籍羨儲十萬請賑貧民得報可兩淮賴之
按應天潘少宰故存德所舉主其子第殺人匿不
出十年存德旣至而其子第就逮視其獄不可生
竟論抵爲書以謝潘出守松江時苦旱六載邁賦

至二百餘萬特設參政督之存德拊循安卹請使
者寬期以候私成是歲大穰使者欲盡征及額存
德又請分三載其後浹歲大熟遂補積逋什之五
六值倭寇逼境近邑男婦奔郡城監司恐奸細欲
嚴盤詰存德力爭謂稍緩則男婦悉遭擄矣奉使
便道歸省丁外艱服除卽家起知南康府病未赴
歲餘稍遷浙江按察副使檄攝嘉湖諸軍不三日
斬倭首百三十級上功匿不以聞調廣東海道兼
諸番市舶利歸藩司提兵援潮陽諭降劇寇許朝

光等八千餘人朝光斬臂誓不復叛以功見嫉被
中歸與弟中分產而推其腴事繼母湯藥親嘗爲
宗人治產授室喪葬婚娶以次及母妻二族所識
貧乏待以舉火者數十家種秫釀酒座客常滿善
大書工古文詞其史評制義博士家宗焉隆慶丁
卯修志其議論皆關邑典後多採之病亟自輓有
易簣從教華且皖布衿止辨正和斜之句卒年七
十一著有結甕堂遺稿十卷行世祀鄉賢子夢松

夢潮皆進士

洪朝選字汝尹

一作字舜臣

號方洲更號靜菴嘉靖丁酉

舉人辛丑進士除南京戶部主事出權北新關抽

貨算緡度歲課幾何盈額而止津梁不閉任舶上

下事竣督放倉儲諸有規畫後人引以爲法一日

思所學未足非古人學優則仕之意上疏引疾客

毘陵僧舍與唐順之講德問業一年始歸又就王

慎中上下議論久之充然有得起爲南吏部郎出

督學西蜀端士習正文體持法秉公人想望其丰

采遷廣東參政調山西歲大祲寇盜充斥多方撫

輯殪其元兇破其黨與晉人頌之朝選不爲嚴嵩
所善而徐階深與之嚴敗遂以山西參政召入爲
太僕少卿尋進僉都御史提督操江疏論盜所由
起與所以止盜之方鑿鑿可行留都以靖旋進副
都御史巡撫山東禔躬以道馭下以法疏陳養民
課吏之政甚詳他議驛遞防河皆爲經久計檄所
司清差重役繁之弊隨地編差因糧制役巨戶無
所規避藩府官校奪民田禁革之悉歸民齊魯肅
然隆慶戊辰入爲刑部侍郎伸直臣沈鍊儒臣閻

樸冤而正巡撫楊順於理徐階去位張居正秉樞

遼王憲癩獄起居正以私憾欲以謀反置之死地

除其國屬朝選往勘命方下居正來謁坐定曰貴

處傳應嘉謀反今做省遼王謀反朝選默然出門

又曰聞遼王差人入京行賄朝選曰果然當題奏

乃疏奏凡楚人入京皆盤詰沿途差兵護送勘事

官員及至襄陽撫按道府已勘成招副使施篤臣

抱牘請書名朝選曰未提審一人徒據現案成招

何須命我公等自成之可也數日施復來見曰遼

王府中豎招兵旗反形已露朝選曰果反則我爲
與師討罪之大臣不然則勘事之大臣使人往覘
之報曰兵圍遼府三匝信息不通于聞法司到無
由訴豎旗府內書伸冤二字終日跪伏旗下候命
朝選曰此臣子待罪禮也匹夫犯重辟求訴問官
尚當審確招詳况親王乎古人有焚梁獄詞者柰
何媚權貴傷國家親親意置其事不問亡何施篤
臣又請云大人招要改便改必欲提人按覆審三
年亦招不成朝選見羅織已定不得已應曰除法

謀反二字其淫虐貪暴則依前招遂以遼王照戴

掄典英事例送發高牆除其國母王氏妃給田十

頃屋一座養贍終身奏入居正猶以爲左心惡之

一時法司同往勸者俱論罷朝選辨本有權臣主

使之言居正忿益甚遂以大計劾罷歸魯御史劉

畏所疏論居正指摘及施篤臣朝選曰令我聽指

使誣以反劉疏及我矣居正聞益恚謂朝選不死

且與劉犄角我也又當居正奪情時進士鄒元標

翰林吳中行疏列其不孝狀削籍遠戍朝選曾移

書壯之稱其文章節義爲居正所跡憾益深不可
解于是密使私人授旨於閩中諸當事或起之田
閒或啗以大位或懼以顯禍冀結其欲而速其謀
有知其冤不肯從者有身受其薦不忍從者朝選
性剛介不能容人過尖里中不平事狷激言之有
宦家子摸捏朝選手板撫有司短長言于當道朝
選不知也時左布政勞堪以支放邊戍月餉搭新
鑄錢失軍心巡撫耿定向檄止之語頗侵堪適耿
招朝選講學每咨以時政堪疑朝選實中之耿以

憂去勞代之遂希居正意乘足籍快已憤陰遣民
令金枝日夜搥撫其無情事以報勞得之大喜以
聞於朝居正從中擬旨削籍逮訊堪得密報遂馳
戎卒逮朝選下臬獄不二日斃之獄中且謂朝選
在川中得回生藥暴尸四五日不得出口蟲至出
尸朝選居官廉潔以名節自砥礪生平有學行政
事之稱致身卿貳而家故貧嘗有詩云負郭原無
半頃腴山田新買百升餘里人莫笑清貧甚欲學
周黃恐不如林居十年許一旦嬰奇禍以死士大

夫無不扼腕冤之者子兢訟冤闕下居正矯旨杖八十仍奪蔭其夏居正暴卒都諫李廷儀條其冤狀朝議堪回籍繼奪職甲申兢再訟父冤有旨下堪獄戍定海未幾詔復朝選官兢補蔭如故一時阿堪意鍛獄及造謗者俱相繼竄逐朝論猶以堪不正典刑未快人心云朝選善爲文所作有氣岸類其人著有芳洲摘稿歸田稿續歸田稿祀鄉賢陳道基字以中號我度徙晉江嘉靖己酉庚戌聯第進士授浙江嘉善知縣廉約明恕吏民畏懷以卓

異徵聞母計奔歸復除雲南道監察御史巡按廣
四時邊徼諸吏類多鬪茸下車按其尤無良者舉
吏望風解綬去行部詢民疾苦銳爲興革尤加意
造士復按廣東柘林兵叛流劫會省城門盡閉商
民數千萬委堞下道基巖兵陳郊坐城郭納入之
振飭風稜郡邑應聲凜雪諸所措注咸足貽方來
畫一以積望擢太僕寺少卿尋移南鴻臚卿爲讒
者所中出爲四川副使遷廣西叅政拊循益力屬
邑告變察其故罷措克令扶悍尉各一人諸巢遂

戢城西南河流舊故橫溢爲築橫橋而東之與灘
江會公私交賴再遷浙江按察使超拜南京都察
院右僉都御史提督操江卽歲改應天巡撫時高
拱復相修徐階宿憾意曩道基外調時徐階尸之
必將快意於階藉手爲釋憾地而道基禮階益恭
吳中巨室爲猾少持無寧日道基檄下所司諸告
密株連者置勿問溧陽史氏有奴誣主者下奴獄
論死自是告訐之風頓息吳中人謹若更生言官

吳某復揣柄臣微指誣摘其短卽日解組行歸遭

外艱讀禮鍵戶廷議用宿望起巡撫順天
伍
除戎器覈幕府市租爲饗士費拂大帥意張相居
正以歸葬故往還良涿閒督臣躬迓道左道基獨
臨邊自如遷南大理寺卿進南戶部右侍郎總督
糧儲尋以工部左侍郎召入督陵工遷南刑部尚
書有孝廉與序班鬪都市前司寇奏當得旨矣吳
欵二相力爲地道基持不動於是言官復疏其短
再疏乞歸竟得請道基長身玉立廣頰豐顙性抗
挺自負一中讒戾再被謗書不以其故少貶嘗曰

我道固是耳家居傲門寡接人弗敢以私干而獨
篤故舊崇長厚既爲列卿見鄉先達逡巡隅坐其
接後進必與鈞禮歷宦不攜家室不置妾媵晚歲
復寢一室左圖右史布衾繖幃蕭然寒素喜談星
命堪輿多奇中年七十五卒撫按以聞於朝賜祭
葬祀鄉賢

李獻可字堯俞號松汀隆慶丁卯舉人萬歷癸未進
士初授武昌府推官疏滯雪抑讞獄得情上官事
有不決屬之輒刃解臬掾有犯法者臬囑寬之不

從徵入戶科給事中會潞王之國疏請諭制在國
無以縱敗禮在途毋以擾困民太后聞大怒請加
譴帝特全之越日譙宮中疏自佉墜顧近侍曰此
李某疏勿失也他如請內帑以賑饑饉決章奏以
防壅蔽伸法紀以全安攘所條陳悉中窾轉禮科
右刑科左主試山西時慶得士值京考以莊愼輔
鑑裁物情翁如陞禮科都給事拜官甫三日上皇
太子出閣講學疏言冊立之典可稍緩而待來年
諭教之典不可停而虛今日皇長子今年十一歲

去古人八歲始學之時已踰其三宜及今春孟特
令禮卿酌定儀注擇吉施行

宜選孝

悌博聞有道術者爲之何必委巷伯之倫而秘之
房闈之內哉疏人有旨謫外元輔王家屏力救封
還內降至於再三帝怒甚削籍罷歸家屏亦遂致
相事獻可抵日以書史自娛事繼母孝撫季弟
甚篤悉予先貲構廬居之誘誨欵至人先知其爲
異母也溫謹謙遜與人交情至於文不以所長掩
人不日人過有善吹揚如不及起家二十年田宅

僅中人產年六十二卒祀鄉賢

蔡守愚字體言號發吾涪洲人萬歷乙酉丙戌聯第
進士授南儀制司主事迎母就養暇與同舍諸名
公證彙古今所得益深詩文日進丁內艱歸襄事
畢採撫前言往行有裨風教者彙爲明倫寶鑑一
書後除工部屯田司主事督理易州龍灣二廠舊
時炭直不早給而惜薪司復從中索例不得以時
納甚且以不如式駁還大爲商病則爲移內外主
者與訂約時其出納給直令商自兌不經他手凡

日用薪蔬例供槩從減省曰母令有餘以爲市又
興二廩社學躬往課督時內官四出採礦守愚曰
民方上供炭課倘被流散誰執其咎且近京師安
得有礦將抗疏評事遂寢擢虞衡司員外遷屯田
郎中去日諸商環擁車爲之坭守愚曰有二社學
在令子弟勿廢業吾棠不翦矣是時方急殿工物
力告誦力贊大司空疏借內帑以郡國贖輸補償
之得報命陞四川副使分巡上川土酋肆掠播州
尤甚以兵備討平之帝嘉其功改播爲遵義晉參

政整飭威茂擢按察司陞右布政皆分道川南會
六詔不靖中丞喬公薦守愚以原官移節建昌建
地延袤三千餘里五衛八所碁置于猺獠番棘閒
蠡聚烏散剽掠多年守愚先後巡川南最久時土
婦瞿繼良與其叔馬應龍爭印仇殺授計遊擊吳
文傑直入其臥內持印而出嫂叔投戈聽命蘭州
土婦奢氏爭權畱印惡目簸弄其閒檄往會勘議
獻首惡及追印爲先如印不可得則疏請史鑄至
首惡惟縛獻日把餘不足問議乃定楊會陷碁江

帝命總督李霖寰徂征守愚以畫策督餉功賜白
鑰採木役興在川南則條無木之難無錢糧之難
并陳諸難易情形甚悉在建則條募夫採木出水
三難又請司帑先給三分之一而以建昌之杉易
重慶之楠兩地交便威茂餉米三萬餘藩司給直
灌縣買運不時積欠無稽爲條包攬搪塞乾銷私
兌那新補舊諸弊竇立三限掛銷獎戒法分派新
繁崇寧郟彭產米諸邑店戶買米不齊驗糧官督
之腳戶運米不到監收官督之其久逋者量追米

腳價給軍自是威茂無滯餉其徙建昌則寄李雅
州單車泄焉忽猱從山谷突出衆驚竄守愚端坐
不動猱至曰此菩薩也相率禮拜去至則宣布恩
威申明約束番夷戢服復爲晝善後諸策改將增
兵俾嚴戍守爲建南計安備殫心力先後擒斬惡
夷七百餘追還被擄男婦五百餘以積勞成疾乞
休者三而兩臺苦留之遷雲南左布政候代會大
帥侯某移鎮越嶲欲計擒黠酋烏撒以爲功亟馳
止之曰是未可輕也彼巢據官道而力能號召執

之必啓釁既別去而帥決計誅之自是會孽奮呼
諸夷響應道路梗塞踰旬守愚聞報失聲曰不聽
吾言噬臍何及爲撫諭熟夷檄將召兵然後利濟
鎮西之閒享無事焉其威惠素孚也未幾得代致
仕而直指彭某竟用流言以考功法中之蓋自建
南被禍士民日請大征而當事日議鵬剿然三尺
孤懸兵餉難處惟守愚謂宜繕儲胥討軍實以防
與撫爲持久計所以安建者在此而得咎亦由此

初土官安世隆爲那固所弑孽婦祿氏糾夷報復

藉口夫亡妻繼求管事而陰欲嗣姪祿所奸弁奸
生有居爲奇貨者守愚責以大義俾逐所而立安
世業然後許之烏思藏之貢者不無生事內地臺
使題參部覆議革而名番求復不已守愚謂貢額
國初已定彼賣勅之利孰與貢賞之所獲厚川省
三萬茶引亦惟貢番貿易通行今關門一閉無論
茶法爲沮卽軍需且歲增數萬竟如其言復之于
是諸番願世世奉款而肖守愚像于宏化寺中嘗
署藩篆一月籍羨金千餘無所取吏白以例且曰

如後來者何笑曰我自有羨後人自無兩不相妨
其廉不近名如此生平學術行誼一遵程朱爲人
樂易質直無妍媸態以故特立寡援至家埽軌讀
書絕跡城市扁所居軒曰寧澹客至尊酒盤殮不
爲厚具曰惟澹可久戒諸子曰得不得命也非分
之有不必過求爲詩有魏唐風味文出入經史具
載百一齋稿中年七十卒祀鄉賢

蔡復一字敬夫號元履用明子萬歷甲午乙未年十
九聯捷進士給假歸娶授刑部主事歷員外郎有

所平反多出其判丁兩艱服除補兵部車駕遷武
庫郎中每陳籌邊事宜司馬採以入告久之遷湖
廣參政分守荆岳清積逋覈虛冒革加派足軍糈
嚴保甲禁驛騷杜參謁壬子癸丑兩驟江漲堤蕩
盡決極力賑恤時三道並缺奉檄兼署辰沅諸郡
多積逋兵乏餉三年呼癸脫巾在途檄諭之兵素
服其威信課始輯亡何鎮尊諸營復沸嚴諭不歸
營不給餉比聽命乃措給之參戎請調苗兵千人
制之不從曰豈有借苗兵殺民兵之理徐按首禍

七人正沃鴟張始息進按察使大小五冲苦苗患
攝兵備篆十月三度報捷復築邊牆七十餘里又
黑苗屯鎮遠偏橋閒官道爲梗出牛酒令兵民誓
相應援道始通會黔撫有大征紅苗之議檄永順
保靖二土司助蜀土司攻之復一云神苗禍專在
黔黑苗害楚淺而害黔深紅苗毒蜀蜀宜角之今
黔代蜀憂不以黔殉而逼楚殉之辜衆葛耕烏能
保以鄉鄰挺纓冠之鬪大拂黔撫意遂引疾歸時
已推河南布政楚人請以加秩留原任旨報可而

後一暨辭世家囊中如洗抵里猶未有居光完印
位起備兵易州遼陽報陷出俸金募鄉壯修器械
爲備而京中諸貴人遣妻子避難乘傳絡繹不絕
下檄非奉廷遣悉裁其符銜者疏誣其聞變涕泣
復一上章自理且揭云請以兵加頸誰先皺眉請
同過三岔河誰先縮足又云必書帕關說之外方
有真人品言者大慚擢山西左布政以病告爲納
言所格南返聞河西復陷歎曰茲豈臣子養高日
哉力疾之晉時邊楮緊急加派難堪上獨增餉抵

卷之六十二

三

京運二疏格不行又于逋者裁其浮征勉以正額
民爲樂輸宗祿邊儲原緘給發在任凡七閱月天
啓二年以右副都御史撫治鄖陽益勵清白歲大
旱步行祈禱自狀其罪布衣素冠自繫于獄是夕
遂大雨寮屬士庶迎之乃還鄖賦萬金加額至四
萬有餘復有舊逋七萬餘疏請免之覈屯額肅軍
實飭吏懷民種種畢舉三省視爲領袖奢崇明安
邦彥反貴州巡撫王三善敗歿進復一兵部右待

郎代之喪亡之餘兵食盡絀斗米銀八錢復一勞

徠拊循人心乃定尋代楊述申總督貴州雲南湖
廣軍務兼巡撫貴州賜上方劍便宜從事節制五
省復一乃召集將吏申嚴紀律遣總理魯欽等救
凱里斬賊衆五百餘賊圍普定梟賊閒陳其愚以
殉遣參將尹伸副使楊世賞等合擊之邦彥負傷
而逃遂搗其巢斬首千二百級發兵通盤江路斬
逆酋沙國珍及從賊五百已大破賊汪家冲斬首
二千欽等復破賊汪家冲蔣義寨斬首二千二百
長驅織金織金者邦彥巢也緣道皆重關疊隘木

石塞山徑將士用巨斧開之或攀藤穿竇而入賊
戰敗遁深箐斬首復千級窮搜不得邦彥乃班師
是役也焚賊巢數十里獲牛馬甲仗無算復一以
鄰境不協討致賊未滅請勅四川出兵遵義畢節
抵水西雲南出兵霑益抵烏撒犄角平賊帝悉可
之因命廣西雲南四川諸郡鄰貴州者悉聽復一
節制六疏請益餉未下而施州遵義兵萬餘始至
衆議因銳渡河復一戒勿深入令渡河六十里劄
谷里驛酌進止乃兵甫渡河而施兵先逃二千餘

魯欽謂師退必散不如直搗其穴遂徑趨水西遇賊數萬力戰破之斬馘千餘次日霧賊來襲戰卻之是晚施兵先潰賊從後襲擊諸營盡潰死者數千人時復一爲總督而朱燮元亦以尚書督四川湖廣陝西諸軍以故復一節制不行於境外欽等深入四川雲南兵皆不至復一自劾因論事權不專故敗巡撫御史傅宗龍亦以爲言廷議移燮元督河道令復一專督五路師御史楊維垣獨言燮元不可易請令兼復一任帝用維垣言解復一任

聽勦而以王瑊爲右僉都御史代撫貴州復一俟
代仍拮据兵事與宗龍計剿破烏粟螺蝦長田及
兩江十五砦叛苗斬七百餘級賊黨安效良首助
邦彥陷霑益雲南巡撫沈做煇遣兵討之未定遷
侍郎去代者閔洪學招撫之亦未定及是見雲南
出師懼約邦彥犯曲靖尋旬復一遣許成名往援
賊望風遁長田苗酋天保阿賈約水西賊欲斷平
越餉道復一在病中曰一息尙存豈可以賊貽君
父憂檄諸將分路進剿遣劉超等生擒保賈殲賊

首五十餘名破百七十四砦斬級二千二百五十
有奇平越人謂入三百年不到之地成二百年未
有之功而西賊失一大臂矣捷報正患瘡痍扶病
至平越愈劇猶上捐俸助工疏十月卒於平越軍
中訃聞帝嘉其忠勤贈兵部尚書賜祭葬諡清憲
蔭一子官廷議欲諡以忠不果避魏璫名也復一
學博才高下筆千言兼工四六他諸著作皆崇論
宏議涵古茹今至書牘奏議之文慷慨談天下事
切劇豪貴披吐肝胆而詩則出入漢魏唐宋閒居

然一代名作生平耿介負大節有志聖賢之學經
濟文章特其緒餘人比之張襄惠嘗自易州貽何
喬遠書曰宮事則客媼與魏闈相表裏朝事則牛
李構鬪疆事則經撫矛盾而戰守無穩著此三憂
也淮南憚汲黯江左有夷吾將誰望之後皆如其
言其餘論遼事有五未解論銓政有四疑論時事
有三無四多論大學歸于物我一本論克己謂惟
克己乃由己又云某生平服膺三言報國恩以忠
心擔國事以實心持國論以平心又云某惟學正

已不求四字耳所著有遜菴全集特祀鄉賢

張廷拱字尚宰號輔吾萬歷丁酉舉人辛丑進士授
懷寧令清內使挾帶私船寬省運民夫丁艱服除
補豐城捐俸築堤以利民改遷安編鋪平法遼左
車馬不疲奔命天啓中歷祠祭司郎中時朝中多
依附權璫獨廷拱正言讜論非端人君子不與交
遊削籍歸莊烈帝卽位求舊賜環以邊才擢僉都
御史巡撫大司召對稱旨帝顧近輔曰廷拱福將
也至則給宗祿恤飢軍修土堡制火器邊計靡弗

周密警告猝至禦變投機敵不能犯以焦勞成疾
及亟諄諄誠諭諸將竭力報國言不及私卒年六
十五賜祭葬諡襄靖祀鄉賢

林一柱字廷郢號璞所啓元孫萬歷丙午舉人庚戌
進士初理揚州薦糾綜覈輿情允協治獄多平反
不輕鞭扑歷署三篆皆有廉名試湖廣御史疏奏
切直請臨朝正紀綱有六逆五盡二反一順之目
海內傳之熹宗初年疏數上歷陳賣士餉卒名存
實亡之弊雪幽忠明功罪至有世運當阨舉國若

狂之句畱都東宮火請復建文廟號劾織造監李
實制官虐民必亂天下閱黨側目因謫告例轉廣
東參政拂袖歸居家以老友稱及再召而一柱已
卒祀鄉賢

林鈇字實甫龍溪籍萬歷壬子舉人丙辰進士殿試
一甲第三人授翰林院編修歷國子監司業遷祭
酒監有銅鼎銅缸爲臨雍會食及貯水備火之器
魏璫欲假鑄錢鈇持不與時璫擅權烜赫立祠幾
遍天下一日諸生執呈至鈇問云何對曰魏公功

德巍巍宜立像太學請定判鈇曰諸生宜熟思之
孔聖嚴師也禮有人主北面之尊魏人臣也若並
列座他日皇上入學謁奠君拜於下臣偃於上能
安之乎明日遂稱病去莊烈帝卽位聞之歎曰危
行言孫君子也召復原官晉禮部侍郎兼侍讀學
士七年以枚卜召對陳用人理財靖寇寧邊四策
卽日拜東閣大學士入閣辦事時帝方疾黨人以
鈇誠慤不立門戶特加眷顧首輔忌之困以煩劇

遂以勞疾卒於官謚文穆鈇冲淡和平廉介自守

鄭芝龍受撫奉千金爲壽卻之復其書曰成人之美君子也因之以爲利非君子也芝龍亦爲歎服
忠烈

蘇 緘

陳 顯

葉秉訖

劉 雄

周彝訓

胡有耀

郭 富

蔡希旦

黃岳霖

范 方

郭寅日

葉翼雲

陳鼎

張璇光

林壯猷

洪有禎

杜輝

張敏

明忠義附

宋

蘇緘字宜甫素負義氣寶元元年進士初授南海簿
委查番舶商樊氏升階就坐叱杖之樊訴于州州
責緘緘曰簿雖卑朝廷命吏也杖部民何罪之有
州不能詰再調陽武尉有劇賊李者州縣莫能擒
緘訪得其處率衆入賊巢大索火旁舍以逼之賊

從中逸出緘馳馬斬之送府府尹賈昌朝驚曰儒者乃爾輕生耶累遷秘書丞知廉州民茅竹爲屋多火災飭易陶瓦懲吏之貪墨者改知英州儂智高圍廣州緘募士數千人季印於提點刑獄鮑軻夜行赴難廣人有黃師宓者陷賊中爲~~地~~謀主緘擒斬其父復捕殺不逞者六十餘人~~報~~其誑誤者六十餘人使復業賊勢沮將解去緘分兵先扼其歸路與賊戰大破之奏至仁宗語執政曰南事淹時戰將未聞有成效蘇緘乃儒生能奮力如此宜

加優獎授供備庫副使充廣南西路兵馬都監遣
中使賜朝衣金帶牙笏以寵之賊至邕大將陳曙
以失律誅緘亦坐貶房州州同英宗卽位以大臣
論薦復供備庫使知廉州戍卒禧醉焚營延燒民
居乘以爲竊緘戮禧于市坐謫譚州都監未幾知
鼎州熙寧初進加京使廣東鈐轄知邕州充皇城
使交寇陷欽廉乘勢逼邕破四砦緘閩郡得羸卒
二千餘選士乘舟逆賊斬蠻酋二設方略分地拒
守請救于桂州沈起劉彝獨遣一將張守節以怯

懦敗外兵無一至者被圍四十餘日緘晝夜行勞
士卒發神臂弓射賊所殪甚衆賊爲雲梯又爲攻
濠洞蒙以華布緘悉焚之蠻計窮將引去而知外
援不至或教賊囊土傅城頃刻高數丈蟻附而登
城遂陷緘猶領傷卒馳騎戰愈厲而力不敵乃曰
吾義不死賊手亟還州治殺其家三十六人藏于
坎廼縱火自焚賊至求其尸不獲城中吏民被屠
五萬餘人隕三州城以填江初緘憤沈起劉彝致
寇又不救患欲上疏論之屬道梗不通廼榜其罪

於市冀朝廷得聞焉神宗聞緘死嗟悼至晡時方
進膳歎曰可惜蘇緘近世忠義之臣罕見其比贈
奉國軍節度使諡忠勇賜都城甲第上腴田十頃
聽其家自擇以子元爲闔門祇候召對便殿諭之
曰邕州賴卿父守禦桂象皆得保全昔張巡許遠
以睢陽蔽捍江淮較之卿父不能過也改元爲殿
中丞通判邕州子孫與緘同死者皆褒贈起與彝
坐謫官後交人謀寇桂州行數舍見大兵從北來
呼曰蘇城隍領兵來報怨懼而引歸邕人祠之元

祐中賜額懷忠祀鄉賢又祀忠義祠

明

陳顯洪武壬子舉人知德州太宗時爲燕王廉其才
辟掌書院嘗乘奔諷諫旋以病告靖難初遣使召
顯夜沐浴具衣冠再拜而死祀忠義祠

葉秉乾慷慨尚義正統辛酉饑出稻二千石以賑貧
民賜救旌義勞羊酒復其家己巳沙尤寇羅興甫
作亂請于官督民壯殲之山賊陳敬德攻縣掠鄉
募義兵千餘從王簿蔡遶擊走之海賊張秉彝駕

船二百餘圍中左千戶率兵戰卻之賊退復圍高
浦乘乾力戰俘賊十餘斬首數百級賊怒鳩衆圍
之豪嶺突圍被執脅之從大罵曰吾奉義討賊不
幸力屈速殺爲幸豈從汝反賊誘之再四不屈肢
解之成化初御史涂棐奏旌其門曰忠義祀忠義
祠孫元齡嘉靖初應義隨大兵破滅汀賊有祖風
劉雄字逸圃倜儻尚義兄早故獨肩子職經營致富
所居積善里在泉漳孔道之傍官吏過往者皆宿
其家供帳迎款不稍怠門下食客數百人多勇敢

忠直之士藉以捍衛鄉井固守封疆正統十三年
沙尤寇發由漳襲同雄度邑中倉卒莫備乃散家
財萬緡鳩義衆率門客家僮擊退之邑賴以完賊
大恨越日復率衆來攻正交鋒間馬逸入海淖中
家僮八人奔隨之盡被殲焉賊復縱火焚其居闔
家俱遇害惟妾吳氏先是攜三歲幼子往鄰鄉母
家得脫難邑令爲視殮致祭葬之本里路傍龍亭
嶺後八僮耐葬於有鄉人哀之稱曰義墳坡元孫
存德嘉靖戊戌進士

周彝訓積善密山人正統己巳歲倭寇近鄉倡義率鄉兵禦之馬陷泥濘中死之子懷炯以救父亦死之今其地號陷馬堰是也

胡有耀字子謙諸生素輕財仗義爲鄉人所信嘉靖戊午倭寇至其鄉有耀散財結社以禦之度力屈令其妻子宵遁謂之曰吾與衆盟義無獨去明日率其徒與鄉人併力爲拒賊計以脫諸婦女老稚力罷爲賊所得罵不絕口被戮獨慘事聞贈州同

知給其子冠帶祀忠義祠

郭富字懼仁後郭人陳慜尚義善射嘉靖戊午倭寇
攻城中外震駭富奮不顧身從城上射殺二倭分
巡盛公嘉其功賜以金不受越己未倭又攻城富
率衆縋城而下追至埕西發矢又中斃一賊賊怒
羣擁而前莫有援者遂爲所殺時五月廿九日邑
人義而哀之

蔡希旦字可久號中溪習儒業弗遇力農以供親嘉
靖庚申倭夷內訌念父未葬盡出家中藏羅諸庭
而身守之已而倭不至偕二弟趣嚴具自操杵鍤

成墳至指盡血旣襄事而賊愈迫里中闔謀禦之
推希旦爲首悉括丁壯得二百餘人晝夜巡警而
親勸督之數日賊大至衆相視無人色希旦挺身
出衆從之賊揮刀引騎衝其胸倭從之十砲齊發
衆遂奔希旦立不動一人曰衆潰矣乃引卻已而
賊三道繞其後衆莫應者賊遂剗刃希旦死焉年
甫五十希旦嚴謹仁厚嘗讀書野寺一婦夜款門
希旦曰可速去恐僧見辱婦固求宿乃大恚閉門
不納寺有小僧暴卒已就木矣希旦探其懷微溫

久而起之旁舍媪無子嘗向希旦乞食一日媪不
至希旦曰必病也遣子往視則臥簣德甚復持粥
粥之媪病尋愈族有子忤繼母父怒將沈之水希
旦曰子無狀誠當死然恐人以惑後妻殺前子也
命撻之予以更新子因感激及遭難知不知無不
流涕後以子守愚貴贈主事晉贈四川按察使
黃岳案崇禎初爲廣東英德尉四年寇犯城督兵戰
死英德人祠祀之又祀本邑忠義祠

范方字介卿後遷長泰博學礪行推重于鄉天啓辛

酉解元性耿介聯同志爲社異趣者擯不入與黃道周盧若騰沈佺期尤以氣節相尚試春官不策見逆闖濁亂時事日非歸閉戶卻掃無仕意崇禎初闖黨伏法乃更北上卒三困禮闈以道周薦國子監助教貧淡如常鬻文自給見流寇鴟張國計漸蹙每在學舍扼腕嘆息歷遷戶部員外郎以給軍餉籌守禦力言于王者未幾闖賊陷京師朝中或屈膝迎降或竄匿苟免或被拷掠索金獻至數十萬惟方及范景文馬世奇金鉉等數十人死焉

方闖賊入整冠帶坐部署如故賊執之問倉鑰誰
掌曰我掌問匙安在曰頭可斷鑰匙不可得鋒刃
交下猶噴血怒詈濺滿署堂面不改色賊開倉鑰
堅若錮斫門始得入人謂方魂實爲之其長子登
楓爲同邑諸生甫冠婚自家來省視適遇難揮之
不去殮方旣畢號痛出血數升絕吭其旁有老僕
爲并葬於邑之義塋方著作甚富以海氛蕩析無
存唐王時盧若騰署浙撫上方死事有特闡死義
之幽乞補褒旌之闕疏有命范方被執不屈大節

可風准察明優卹嗣唐王敗遂寢祀忠義祠

郭寅日崇禎辛未歲貢任陝西平涼府通判陞同知
李賊陷城寅日不屈與二子偕死之祀忠義祠

巢翼雲字敬甫一字載九崇禎庚辰進士知吳江縣
初至歲大旱蝗緩征平糴捐俸設粥步禱龍祠日
行數里立法驅蝗蝗皆墜湖死是歲雖災不害時
議者以國帑詘欲因畝加賦翼雲條上其不便所
省六萬周行城郭相度形勢令城外四周皆康衢

可馳馬其上增築臺舍嘗自戎服閱兵郊外夜復

巡行闖闖閒十七年夏北都變聞不軌者洶洶思
亂翼雲廉得其主名立捕殺之一邑帖然尤好獎
拔才士培養善類遷刑部主事乞歸吳民思之不
置唐王入閩擢稽勲員外後因城破被獲不屈死
闖門遇害

陳鼎更名命鼎字子凝號象圖祖籍漳州北溪仍入
漳庠天啓丁卯舉人甲申變後躬自耕稼混跡緇
黃唐王在閩復本邑教諭 大清兵至城陷鼎自
縊於明倫堂

張璇光號義山浯島人磊落自豪讀書有獨得年二十補邑弟子員踰年餓於庠崇禎之季時事日非自傷不能借箸報國每劇飲盡醉慷慨悲歌或繼以痛哭及甲申聞都城煤山之變絕粒數日不死持巾櫛嘆曰太祖頒諸生巾自冠臨朝三日取前庶人後三公之義爲諸生者獨不可以三公之義自効乎自櫛髮赴里中井脫未履其「」投井中水淺僅沒其半乃俯首就淺水中死聞者奔援之不及時年二十有六曾孫時霖乾隆甲子舉人

林壯猷十二都周邊人崇禎閒爲銅涪哨官福王時
遷都督同知守永定移駐同安我朝大兵至城
陷舉家死以殉

國朝

洪有楨字亮士嘗授徒里中督其子弟甚嚴謹丁亥
兵起有楨從俠客糾海邊壯士數百人守漳浦城
陷被執見大帥有楨挺立不跪目直視髮上指旁
執刃者皆大駭帥怒命縛于市磔之縣其頭于城
東門暑月血色數日不變青蠅無敢集久之士卒

投其頭于濠于是門卒皆病中夜狂叫若有物擊之者乃相與求其頭羅拜瘞之有楨工書法做文徵明賈人持售外國得重價歿後隻字之遺珍于拱壁

杜輝弟杜達灌口人康熙二年自海上歸誠輝加總兵官左都督銜達授廣東都督銜四年補輝廣東右路總兵官七年缺裁奉召入京特授輝永兆鎮總兵達以原銜隨兄之任十一年值吳逆反輝

兄弟俱被脅至湖廣日圖歸正密遣人赴大將軍

貝勒王軍前訂期內應謀洩兄弟俱被戮其家屬
僑寓廣東逆平事聞 賜祭葬加輝光祿大夫達
榮祿大夫 賞給家屬回籍銀兩並米石等物

附明忠義一人

張敏字輔德涪洲人正統乙巳沙尤寇起敏季父益
彬集里中人保障爲仇所誣逮長者戍軍幼丁闡
割之敏與其兄張慶張本俱被闡送詣京師稍長
選入內庭敏雖幼而言動舉止迥異常兒凡有謀
爲出人意表英宗擇爲青宮近侍事憲宗恭慎無


過遇事婉諫微言憲宗嗣位敏旦夕左右夜具衣冠寢至子夜輒起以侍有所聞見未嘗外洩外延諸事概不干預忠謹之名溢于宮禁嘗奉命操練騰驤四衛官軍兼理十九房馬政監督五軍大營未幾賜璽書總督十二團營敏持嚴而能推心體下偏裨士卒莫不懷畏前後賞賚若書籍圖書蟒衣玉器金鞍之類不可勝數又於常廩外歲給米三十石特除其家戍軍籍五處召工圖其貌用璽識歲月敏兄弟三人同入禁掖俱見寵任兄本以

御馬太監守備南京慶以司禮太監鎮守浙江而
諸子暉鴻臚寺卿苗太常寺卿先是憲宗春秋高
未子孝宗母紀太后以嬪御得幸有娠其時萬貴
妃專寵昭德宮慮其妬害不敢以聞託爲病瘖得
廢居安樂堂庚寅七年遂誕皇嗣將溺之敏曰今
萬歲未子卽不遽上聞何至棄爲自是加意養育
紀太后乳少敏時獻餅飴粉餌哺啜旣隔月與西
宮吳廢后保抱維謹不使萬妃知以萬妃妬故亦
不傳於外庭成化十一年孝宗已六歲憲宗尚未

知敏密結萬貴妃太監段英乘閒言之未得便一
口敏爲帝櫛髮帝照鑑嘆曰冉冉矣而未于敏伏
地稱死罪曰萬歲有子也帝叱曰安得有敏叩頭
言狀帝命亟召見時孝宗胎髮未剪長披地走入
帝懷牽衣遊戲手捋帝髯帝大喜遂出示羣臣冊
立爲太子徙居紀太后於永壽乙巳敏被疾帝累
遣太醫院診竟不起訃聞震悼賜銀幣爲殯殮具
遣司禮御馬二監治喪復賜寶鈿二萬貫祭二壇
戶部給齋糧麻布工部造墳特賜冠帽牙牌玉帶

及孝宗嗣位追賜敏璽書官其家人於是苗累官
南京通政使列於九卿質手錦衣衛指揮同知管
衛事暉亦以慶蔭官光祿寺少卿食三品俸賜敏
塋地通州三百畝守卒二十人其後有錦衣千戶
張鵬張臻百戶張宏恩澤之事聞所未有苗子定
登進士

卷終



同安縣志卷之二十一

循績

陳綱

蘇紳

宋宜

石賡

劉達

林棐

郭巖隱

曾秘

許衍

薛舜俞

薛舜庸

吳子斌

許巨川

許伯詡

王南一

柯南起

彭用乾

黃廣

林賢生

周源

林啓

葉錄

楊舜

葉蕩

黃

驥

黃良弼

謝崑

王佐

陳健

蔡宗德

呂文緯

盧天佑

工時拱

李春芳

王三接

林叢槐

張應星

黃傑

郭夢得

陳榮祖

蔡貴易

池浴德

李鈿

葉明元

林一材

洪邦光

李文簡

陳榮選

黃文炳

蔡用明

張日益

王道顯

張繼桂

劉夢松

蔡獻臣

黃華秀

郭日烜

陳基虞

柯鳳翔

陳則采

胡明佐

林應翔

陳穀

蔡鍾有

洪纖若

蔣芳鏞

池顯京

林宗載

周家椿

周爾發

陳如松

蘇寅賓

張朝綱

康爾韞

葉成章

劉夢潮

劉廷憲

黃其晟

陳昌文

盧經

陳文瑞

張璿

蔡國光

林鳳儀

張朝綬

郭貞一

盧若騰

陳觀泰

劉夢齡
劉佺齡

陳睿思

劉球瑛

張金友

洪心澄

陳還

池繼善

莊仰旻

洪淳瑛

郭展縱

林雲嵐

陳鵬南

劉承業

林翼池

劉瀚

陳鳴珮

朱

陳綱字舉正父元愷善屬文終龔邱令綱淳化三年
進士爲建州觀察推官故事歲春夏率丁夫數萬
採茶綱入奏請以北苑茶供御餘皆賦民收其租
入在民者官復定其直償之則民不困而國亦利
詔如其請建民德之累官淮南江浙荆湖制置發
運使祀鄉賢弟統統子昌侯俱進士

蘇紳字儀父初名慶民天禧三年進上歷宜安復三
州推官改大理寺丞母喪寓揚州州將盛度以文

學自負見紳文驚服由是知名再遷太常博士舉
賢良方正科擢祠部員外郎通判洪州徙揚州上
十議進直史館爲開封府推官三司鹽鐵判官時
衆星西流代地大震方春而雷詔求直言紳上疏
極言時事安化蠻蒙光月寇宜州敗官軍殺鈐轄
張懷志等六人紳言今日之患由往者守將失計
而國家姑息太過此時可緩圖不可速取請命轉
運使備數年兵食爲持久計扼其出路俾進無所
抄略伺便卽搗其巢諭以送款且詔旁近諸蠻毋

得相撓 首級卽行優賞不出一年逆寇必就歿
滅朝廷施用其策遣馮侗已守桂州經制之蠻遂
平又陳便宜八事曰重爵賞慎選擇明薦舉異章
服適才宜擇將師辨忠邪修豫備帝嘉納之進史
館修撰擢知制誥入翰林爲學士再遷尚書禮部
郎中王素歐陽修爲諫官數言事紳忌之會京師
閔雨請對上言國之號令不專於上威福之柄或
移臣下虛譁憤亂故其咎僭厥罰常賜意以指諫
官也諫官亦言紳舉御史馬端非其人改龍圖閣

直學士知揚州復入爲修撰權判尚書省紳博學
多智喜言事銳於進取願亦善中傷人改集貝修
撰知河陽徙河中未行卒葬於丹陽祀鄉賢子頌
宋宜天聖八年進士以便養親簽判本州治平中除
太常少卿熙寧初知漳州有政績及卒朝廷遣人
禮葬生平文行爲州里所推元祐中劉康夫作修
學記稱其行事全乎天理祀鄉賢

石廩字聲叔皇祐元年進士累遷大理寺丞王安石

奇其文薦之以議新法不合遷審官院旋外補登

湖南提點刑獄廣西轉運官卒祀鄉賢廣子元

教爲泉州長史悉貨市書後六子皆入仕爲甲族

石巨字彥明廣從弟嘉祐八年進士累遷司農寺幹

當公事熙寧中淮浙江東饑從司農卿張諤賑濟

所過盡發官府庫置場給散又募收養遺棄小兒

所全百餘萬有司劾其不循常法與諤俱罷巨曰

使事有指將以施實惠於民也若以法繩之敢逃

罪終陝西運屬嘗編漢唐名臣奏議五十卷自爲

文集十卷祀鄉賢

劉達字公達元豐八年舉進士第一人調越州觀察

推官累官同知樞密院事申書侍郎崇寧五年正

月徽宗以星變避殿減膳達請碎元祐黨人碑寬

上書邪籍禁帝從之夜半遣黃門至廟堂毀石刻

翼日蔡京見之厲聲曰石可毀名不可滅也二月

京免相達與趙挺之同心輔政盡更張京所行事

進用元祐黨人子弟後京令其黨後由紹述之說

鄭居中言陛下所建立乃厚下裕民何致天譴輒

更張耶帝遂疑達於是京黨論達專恣反覆引用

邪類出知亳州京復相再謫鎮江節度副使安州
民往京復罷起知杭州後召至都卒贈光祿大夫
呂大奎贊曰崇寧之初耿耿孤忠政尚元祐弊革
熙豐國事一新公其彌縫千載垂休斯文有功祀
鄉賢

林棐字彥忱元豐八年進士嘗判沂州以行河勞賞
驟遷郡守部使者薦擢太府少卿有詩文行於世
祀鄉賢

郭巖隱字石庵靖康二年由明經舉孝廉仕都轉運

使歷粵東節度使有廉聲朱子溥同時式其廬卒
爲葬崧山巖下題其墓曰安樂窩

曾秘字泰之與朱文公友善乾道五年進士薦授國
子監丞知惠州時盜賊蜂起道路不通秘捐俸繕
亭驛增冷泉叱馭秀麗等庵設兵防守以便行者
後知漳州惠民遮畱終朝奉大夫卒祀鄉賢

許衍字平子慷慨喜言事紹興二年以太學生伏闕
上書士論躋之乾道八年上舍登第嘗進本論二

十篇言四民利害及上供銀攬戶之弊失子與書

謂其仁人之心未嘗忘天下之憂條究汀漳泉經
界甚悉通判建寧府未赴卒祀鄉賢子伯詡以蔭
入官知仙遊縣終福州府通判

薛舜俞字欽父紹熙元年進士教授南劍州未二三
府交薦差江西漕司幹官堂審除吏部架閣以言
者罷後起江東常平幹官與其長李道傳賑荒多
所全活改知金華縣守督宿逋苛峻舜俞引誼力
爭寬期示信民悉樂輸罷歸卒舜俞問學淹貫議
論磊落挾負才氣仕數齟齬里居教授門人多通

顯著有文集及易抄詩書指三百餘卷祀鄉賢

薛舜庸字惠父舜俞弟紹熙四年進士調龍溪尉改分寧丞嘉定閒知古田縣民間牛死例諭錢於官舜庸嘆曰民不幸喪牛又責入錢是重困也立命除之增廩餼建閣藏書以惠生徒通判興化軍未上卒

吳子斌字伯全少遊上庠有文名嘉泰二年進士知南豐縣有惠政秩滿民詣臺借留者千計通判肇

慶府卒於官祀鄉賢

許巨川字揚甫學得伊洛之傳嘉定七年進士歷廣
州建康教授篤意訓誨成就甚衆士祠之學改秩
知東莞縣捐橐金新學宮給沒官田一頃八十三
畝歸學贍士儲錢十萬爲異日修治費邑務雖煩
常與諸生講解至其拊摩軫切催科數負殿中書
劉克莊時爲計使閱其斷訟以爲仁明兼至莞民
亦建祠祀焉王管治司辟守象州祀鄉賢

許伯詡字子揚以父衍蔭官嘉定九年轉承事郎知
仙遊縣政多慈愛有便民錄數十餘條終福州通

判

王南一號桂軒紹定閒擢兩科第以國子博士知漳
州以循吏稱洪天錫題其坊曰兩科太守祀鄉賢
柯南起字時泰號覽山積善坂尾人少有英略狀貌
魁梧宋元革命民不聊生公保障密山全活萬人
宋祚終以人材薦授同安令繼而冗臺平章征南
饋餉不絕陞泉州路治中左遷龍溪縣尹改授忠
翊校尉知漳浦縣招撫流亡治有成績復授南劍
路將樂縣尹兼勸農事蒞任五年尋謝歸杜門不

出

明

彭用乾會心正學耕讀教授洪武十四年令方子中以孝弟力田薦授臨朐丞復除光息調徐聞有惠政擢知其縣清苦不以家累自隨卒於官年二十九其甥負骨歸葬焉

黃廣字文溥建文壬午以貢入太學永樂閒歷知德慶州署肇慶府事興學校均徭賦招逃亡減鹽鈔民賴其惠雖強梗徭人亦聽撫焉士民祀之名宦

家居爲本邑奏除荒田歲賦五百餘石鄉人德之
祀鄉賢

林賢生字朝垣永樂十八年舉賢良方正赴京以鹽
戶單丁陳情詔授程鄉知縣居心慈惠而治邑嚴
明縣人謠曰林公如虎軍民安堵與巡按相左告
歸結廬斗仰巖與友人葉文堪窮孔釋號隱溪松
叟

周源字子濬成化甲午舉人戊戌進士家貧有志節
初計偕北上鄰舟夜遇盜源因得其遺金百兩盡

歸之知石埭縣律已廉臨民惠遇災能卹有犬鬪
鎖楚路遇舍人子入縣求索源執杖欲奏之闈更
杖舍人子乃解入爲兵部事駕司主事奉身清苦
人所弗堪中官汪直怙寵用事嘗被內密旨襲檢
朝紳家至源篋無長物僅錢數十服其廉由是名
震京師一月之內陞本司員外轉郎中調武選卒
櫬歸不能葬憲副邵莊行部至哭以詩云有身全
白璧無地以黃腸命有司葬之祀鄉賢

林啓字仰之號海峯魁梧軒爽不欲一事居人後介

而能容方而不腐爲文有奇氣成化丙午鄉薦第
一與蔡清相次發解而並以易學倡鄉人爲安陸
州學正遂以易學教士安陸之易實啓開之放胡
文定法爲教人士循軌遐邇莫不聞其名分校順
天四川得士數十輩皆名人報績殊等遷國子監
博士及門如趨韓吏部遣子受經三登賢書一成
進士復遷南國子監丞吏部侍郎楊守陞攝祭酒
當詣京或請他攝楊曰仰之在毋須六舍生羣請
之吏部遂攝祭酒嚴公有恩監故有饌錢費歸公

啓曰是諸生故物也人盡給之宏治壬戌迎母至
京閱月餘而啓病卒於官年四十九囊無一金六
館師生爭致緼僉都御史林俊以所自預深衣方
履殮之祀鄉賢嘉靖中孫天德以貢歷廉州推官
路南知州廉人祀之名宦

葉錄成化戊戌歲貢爲常山開化二縣丞在開化興
文學除奸豪門廡肅然公退則荷畚蒔蔬編竹爲
器躬親農圃事每食一蔬而已仕終感恩知縣

楊舜字世柔號可齋翔風里楊江人習法律補邑掾

部試異等宏治六年赴選告降得上高典史清白
自持苞苴不入邑豪有廖姓橫暴里人發其不法
三十事罪至死當道檄舜訊鞫執法不稍貸邑豪
伺閒夜投白金三百求免舜白令發其私令憚避
姑召其人還其金又捐一年僱役錢造橋梁以渡
行人督賦不受私民無敢逋強盜王宏久爲民患
捕而戮之民害以除嘗逐林行遇盜知爲舜不忍
殺在官六年署篆二年俸資外無餘取屢引疾當
事賢之不忍舍懇至泣下乃許之正德二年致仕

歸途中見一男子凍雪僵舜讓箬至浦城活之始
知爲漳人爲尋其伴而資之是夜忽盜起民各自
救乏殺漳人昇舜及代負行裝過浦城嶺而免焉
人謂陰隲之報旣抵家絕跡城市遇萬壽節衣冠
望闕拜賀武廟崩製衰服哭臨祠堂盡哀三日建
祠宇致祭田率族人以禮祭祀忠孝兩盡可謂
鄉士矣同邑林希元爲之傳

葉蕩字士堯宏治壬子舉人父錄以貢士任感恩知
縣蕩令餘干不數月令行禁止無敢壅惠澤者有

監司倨視諸令至蕩改容禮之以艱歸服除補新
興令

黃偉字孟偉號逸所性敏而慤貌古心淳嘗就府小
史一日投筆曰非丈夫也棄去習經讀書太武巖
正德庚午鄉薦自歛未學不赴春官受業陳琛之
門登正德甲戌進士授南刑部主事治獄情法旣
得則執不可奪公暇求道南四先生書遡穎昌授
受微旨以朝夕自勵凡世好一無所撻其心嘉靖

初應詔陳九事首論敬德必親賢儒遠近習輔弼

必任老成去軟熟節用必自裁減貢獻始除剝民

巨蠹必革鎮守他如選臺諫重守令養人才明職

掌正憲體率中治機又上定大禮疏斥張璠希寵

嗜進妄誕不經上申明舊制疏改正京畿御史不

得仰部司抄奉案驗侃侃無諱出守南雄清介簡

易節省駒從明禮教去淫祠罷不給之徵禁晝遊

之女介直敢爲無所顧忌郡有橋稅毫不私取按

司檄民夫鼻蘇木署牌還之巡撫欲丈田加稅屢

執不從甫三月遂疏歸老穉遮畱不可得以薦改

授松江時張璠當國同年霍翰私爲解且勸一謁
偉曰昨墜馬今病足未能卽稱疾歸自是累遷不
起日惟以養親講學正家爲務丁艱三載絕迹臥
內晨興諸子晨拜家廟或晏起斥跪庭中須拜畢
乃去冠婚喪祭盡革舊俗鄉人化之臺察李元陽
行部謂諸生曰莫道法誦孔子且但學黃先生丁
酉戊戌泉大饑元陽請偉主賑事偉旦暮區畫食
寢幾廢以是殫神畢力疾作而卒郡守爲建坊與

李源田崑並旌所著有海眼存集卒祀鄉賢

黃驥字德倫號梅莊能詩正德初任崇明典史寬仁
莅民臨事善斷以廉聲稱陞句容主簿

黃良弼字嚴夫號白泉正德癸酉舉人授汝州學正
州地簡僻人才落寞良弼以所學爲教文風漸振
克稱厥官陞南京國子監學正六館師生咸推讓
焉良弼才氣俊逸而行率直臨事不避忌諱竟以
是罷官歸囊如洗淡泊自甘人以此高其行云年
六十有八卒

謝崑字鍾璞號次峯在坊人正德丙子舉於鄉以親

老乞學職得金華訓導嘉靖己丑成進士歷知溧陽成安二縣持身潔而馭吏嚴溧陽民喜爭動以財賄取勝崑一律以理法期年訟息在成民尤安之擢南戶部主事監鈔北新關緡銖弗染商船二稅取足常課雜費破格除之吏白除之必斂怨崑曰寧怨歸己毋害歸商由是清操流聞得代惟圖書數肩而已轉南兵部職方員外卽未任卒生平不樂人逢迎亦不能逢迎人歷官十餘年無寸縉之蓄其卒也當道助賻始克蓋棺祀鄉賢

王佐字子才翔風大嶝人嘉靖壬午舉人初知睢州
值河決竭力捍禦河卒平睢人建回龍廟河濱生
祀之擢高州同知南戶部員外郎中以持議忤大
司農出爲兩淮運同爲人剛介在高佐巇解課者
再而家甚清白屏居年八十三矣睢人請於督學
祀之名宦不知其尙在遺移文至今徐待贈之詩
曰白頭如越世赤子未忘慈百畝家無羨千秋食
有餘亦竟以其年卒

附書

陳健字時乾號滄江正德己卯舉人嘉靖丙戌進士

授刑部主事歷四川司郎中決讞鯁直不阿上意
出知南安府政務寬簡與民休息修南安志調廉
州府再知南寧爲政特勤撫綏不務因循歸田後
課子孫崇先祀敦睦無閒云及卒許獬誌其墓

蔡宗德字懋修嘉靖辛卯舉人通判廣州活漳泉之
通番船者百餘人有甲盜葬乙地乙遷其棺他所
甲以棄棺訟宗德佯不聽第約日令乙遷而棺果
還故處又有弟亡僅一遺腹兒兄利其產謀一夫
婦冒爲己子復謀一人證之宗德訊佯怒令棄兒

於水第婦哀慟求免冒子者略不動乃責諭其兄
蒲分以兪業丁艱復除台州活莆田被擄者十餘
人調梧州卒子貴易孫獻臣

吳文緯字道充號壘石涪洲人嘉靖辛卯舉人授藍
山知縣爲民求便利日搜其蠹弊并而芟除之才識
敏贍庭訟一言而決胥吏靡竄手舊有徵輸餘銀
吏以羨白例充私費文緯請歸官充公監司大其
請遍移旁邑曰令不當如是耶往上官按行部邑
庸鄙者或有需求至藍獨無私饋吏懼見謫文緯

不顧卒皆敬重之居荒徼閒蠢蠻蕃育數患苦民
黎一日掠至城下文緯勒兵追捕俘數十以歸度
其勢可盡殲建議平獠當事難之文緯指畫陳可
取狀遂委任其役按地圖部署兵所從入率敢死
士搗其巢窟獠窘乃求撫文緯曰聽撫卽吾民也
定爲約束而遣之獠遂平上其事於朝民立祠祀
焉陞四川簡州知州未任報罷

盧天祐字以順嘉靖丁酉舉人授永豐知縣當嘉靖
之季分宜當國賄賂熾行直指行部率多訪惡人

罰金具賂索永豐天祐第應曰無有縣故無城賊寇雲擾廣兵袁彬等千餘人應召殺賊反搶掠爲亂縱橫閩浙閒天祐刊木壘石塞蹊險蔽關隘分兵防守有捕得通賊者立斬之廣兵至聞其清德竟不爲害會當入覲直指以邑遭殘破奏請丞代丞居下考中道遁去銓部以此連天祐坐失官爲令七月耳歸而無以爲家永豐人建祠祀之

王時拱字曰臣號印洲浯洲人嘉靖庚子舉人榜姓林時年甫十九選授杭州通判所部儲峙供億事

極鹽米而豪猾吏巧爲乾沒宿弊如蠅至則多布
耳目起發弊端徐爲條教搜剔之異時賦入賦長
輒先饋主者以爲例時拱曰如此官自乾沒何以
禁下痛革之吏乃咋舌不敢動民樂輸將已而歷
署仁和富陽錢塘海寧諸篆皆有政聲而富陽節
約愛利尤多民尸祝焉浙苦兵乏儲一日健兒脫
申唶道路爲請便宜發帑金以給當事者讓之
時拱曰帑金易集耳卽有他虞帑金寧足愛耶卒
白大吏許之譁伍靖讓者乃服其識巡撫梅林胡

公檄委團練鄉兵日夜訓督卒乘服習課績爲最
薦於朝璽書賜金擢廣信府同知閩浙孔道游寇
出沒飭于掇惟謹有山東劇賊二十餘輩將入閩
爲亂詐稱應募乘夜闌入城廉其狀令游徼給食
謾爲好語存慰之約旦日給牒遣行而潛使吏掩
捕比曉已執送庭中無一脫者礦賊連結倭寇由
贛內訌信州攻陷永豐玉山二縣且及貴溪貴無
城民傳警各鳥獸散時拱署邑篆乃多方倡率勇
敢守要阨險設伏置疑十餘日邑賴以完旣而援

兵至敵皆殲焉城貴溪度宜鳩工督役不數月而
城成至今賴之奏聞復賜金蓋異數也在任凡五
載值太守入計攝府事比守回已交篆而是夜府
署火仍引爲已責竟以此告罷歸焉

李春芳字實夫號東明賢祐曾孫嘉靖庚子舉人庚
戌進士性警敏年十二食餼十六領鄉薦聞羅達
夫倡教師事之居官清苦初試戶部奉命犒大同
軍故事凡遇部使至輒具豐儀爲餽春芳一無所
持而去授刑部主事執法不阿卹刑江西有懷金

至者正色拒之奏報稱平出守潮州省訟牒蠲贖
緩適有倭患軍務旁午春芳峙糗糧繕器械募敢
死士激以大義明紀律冒矢石潮得無恙潮人祀
之年四十二卒祀鄉賢著有白鶴山存稿

王三接字允康號晉齋未冠領嘉靖癸卯鄉薦庚戌
登進士授南戶部主事分司鳳陽調度軍食力剔
乾沒積蠹羨緡千計會倭寇軼三江畱都戒嚴改
職方協司郎中擢守韶州洗畱獄雪無辜旋病卒
年二十二韶民縞素哭踊如矢所生櫬歸囊橐蕭

然無錙銖之遺三接天性孝友敦倫睦族與人坦
夷不爲矯激之行聲色貨利視之淡如逾壯而歿
時咸憫之祀鄉賢

林叢槐字應昌號三庭東市人年十一遊庠有奇童
稱嘉靖己酉舉人丙辰進士授饒平合年未及壯
而泣事精敏若老吏粵賊蝟起張璉爲之魁聚夥
萬餘招撫議起叢槐單車往諭賊或戕其役人以
恐動之神色自如賊亦畏服竟羅拜擁衛而歸已
而倭來攻城城援絕爲浚濠開窖日夜登陴募壯

士共守城卒完士民爲金城保障圖以紀功再受
賞四登薦擢南戶部主事邑人立石紀德建生祠
祀之在部未久復以拾遺罷歸構別業於城西顏
其堂曰崇真時與同志杯酒唱和晚慕金陵吳越
之勝嘗贏糧一過之竟空囊歸曰吾游足適矣所
著有明農集

張應星字子翼號菊水自幼開敏喜讀書從晉江史
于光邑先輩林希元學盡契所蘊蓄少失父兄常
懷哀慕每忌前披其所藏訣語悲吟墜淚及辰衣

素食蔬終身不改嘉靖戊午歲貢授會昌訓導揭
白鹿洞規教士督學使者徐爌以德行求士諸廣
文入試分授片紙令書無德行之尤者應星獨不
書學使怪問之曰諸生性質不齊然皆可自改苛
求之恐累終身學使大喜因試以世變江河詩應
星賦末章曰厥行伊何行已有恥有恥六何不殖
不邇顏生四勿聖門要旨學使曰張廣文自謂耳
嘗戒其子曰與富人言雖窘毋自說若見爲求也
與貴人言雖是毋過贊若見爲諂也轉清江教諭

道卒所著有四書大略其經管窺燈影子日益舉人

黃傑字一貞號忍江涪洲西黃人嘉靖己未府學選貢第一歷西安麻城訓導海康教諭伊府教授致仕三辭署印操若冰霜貧士有餽必力卻之沐其陶鑄者甚多所至多有可紀而在麻城尤著傑多聞善談論對諸生竟日無一庸俗語聽者忘倦才者愛之中才者教之貧者卹之時以鄉先哲蔡清張岳林希元諸長者爲諸生誦之凡行事不自黜

污亦不爲崖異外不急促而內默喻人於道既轉
海康諸生祖送塞路傑畱衣一襲爲代者別以示
傳衣之意其後代者亦勉效傑麻士賢之歸居橙
山之麓學者稱忍江先生卒年七十八閩撫耿公
定向其門下士也捐金治葬爲之傳楚粵皆祀名
宦

郭夢得號肖野在坊後郭人嘉靖壬戌進士初授湖
陽令潮有逋賦之累民罹其害夢得爲陳於當道

項銀補之民歡呼戴德陞南京戶部主事時

上重方士分遣御史訪求天下符籙夢得以東南
倭患度支不給宜節用以備軍需疏留中調廣東
瓊州府瓊產珠上官採辦吏役緣以爲奸力除其
弊所屬規例悉行蠲免廉聲著於粵中

陳榮祖字克紹健孫嘉靖甲子舉人授永安令出入
常賚糧僱役地方無擾葺保家以杜需索汰冗役
以省詐冒民被火者卹之被疫者禱之立社學選
羅光宇等十餘人爲社師課其學程九了樹有白
額虎噬人齋禱城隍立斃教民始種麻豆芋薑間

間利賴民立祠刻石像生祀焉以清廉陞德慶知
州盡革陋規卒於官櫬經永安焚香哭奠者數十
里不絕永安祀名宦

蔡貴易字爾通又字道生號肖兼宗德子嘉靖甲子
舉人隆慶戊辰進士授江都令丁內艱服除補崇
德復包角堰以捍海潮創尊經閣俾諸生講業含
山巨盜楊雷潘榜者糾聚橫行浙以西苦震隣臺
使者謀遣將兵之貴易用閒計擒其魁餘黨解散
三方安堵遷南京戶部陝西司主事徽人商崇德

者感貴易不擾迨至姑蘇釀四百金爲獻貴易峻
卻之諸商歸而立四知亭後其事督錦衣米鹽入
倉出納十年無糶折晉浙江司員外督浦口倉遷
祠部郎中罷教坊司供應清朝天宮侵冒出知寧
波府時余有丁爲相貴易座主也寧人議開海外
金塘大槪二山謂可墾腴田二萬畝佐軍興有丁
從中主之監司業唯唯促畚鍤役貴易曰此國初
所徙地也役蒸黔而資巨室詎庸利乎旣力白於
上官復究極害爲有丁復書曰鄙人不知其不便

若是事遂寢諸衛所賂結府胥借軍儲數千無還計蒐致之法餉蠹一清海上漁商二稅舊輸郡帑議貯之節定二邑著爲令曰郡牘故在耳寧東門外跨大江爲浮梁兩淮隙地爲豪家占以築室設塵市渡者壅擠多溺於水突未大水壞舟梁漂溺百餘人貴易爲文祭溺者按圖籍得其侵蝕者折其材而平之更新道路浮橋艤舟二十餘艘鐵纜絡之屹然中流自是往來無患士民立碑頌之遷貴州按察副使署督學校所拔得士署司篆出納

惟謹不問羨擢布政司參政所部會安國享嘗滯
人投牒若將有所餽者賈易叱牒還之自是安會
頽首受約束曰畏使君清耳晉浙江按察使游十
民間之喜曰是故寧波守也會吳興董學士范司
成事起訟蠲集貴易一切安靜鎮之曰是無賴子
易煽安足聽也撫按知貴易不爲動則徑下之道
府而董學士家破范司成竟投繯死事聞神宗震
怒當事者咸獲重譴人始服貴易能持重得大體
會入覲爲讒構所中坐鑄一秩歸貴易恬退寡援

挺立獨行易箠之日囊猶蕭然蘇濬顏其堂曰清
白寧郡崇邑皆祀名宦萬歷庚子祀鄉賢所著有
時文集子獻臣

泚浴德字仕爵號明洲嘉靖甲子乙丑聯捷進士授
遂昌令故事郡守應朝時里甲斂百金爲贖浴德
代守卻之會新守至搜舊案山積前令不能決者
日下檄追督浴德檢三百餘案各別年次輕重平
反勒爲數用上之逮繫悉空守大喜追徵詳揭賦

額於時寬以限期不事桁楊人爭樂輸初遂民往

衢開礦爭利不均蜂起爲盜上官以禁凡入衢者
須告縣給符否則以礦徒治之後衢與遂民仇者
皆指爲礦徒送之官無一脫者浴德白於衢道毛
公曰一里往來事事豈能給照十室忠信人人豈
盡礦徒毛公立弛其禁民至訟庭一毫緡鉞不入
官只袖米半升往返卽可結案安業咸稱爲池半
升隣邑有難決者悉檄剖之丈量議起編派既定
有以多爲寡者有全畝隱匿者先拘豪家置之法
懼乞再丈許之無一差漏有浮額者充學以贍貧

士縉雲諸邑爭告當道請於德在文編法如遂百
姓歡欣擢南吏部考功主事民赴臺乞畱編賦四
閱月編成黃冊乃就道至龍游萬人曳舟三日不
得發行壯者奪舁夫肩之夜半解纜慟聲遠聞衆
爲蓋石亭於西明山水滸曰曳舟亭鐫云江水比
恩猶有底溪雲護石更無心後祀之名宦至南都
三月轉北吏部稽勳司丁外艱抵家僅餘四十五
金起補原官清介端嚴無敢干以私遷考功員外
陞郎中調護士類常與相張居正相左會汰天下

完員居正戒部汰其人不復聯浴德竭力調停得
不汰者十二三有楚司理趙采行取入京爲南部
所揭居正欲斥之力持不可居正趣益急浴德稱
疾而太宰竟逢相意罷之轉太常寺少卿有冊封
之命事竣告歸屢徵不就諸當道海上事宜皆就
決知無不言奸宄斂迹盜賊相戒不入境年七十
九卒是月大星自南墜有聲山鳴三夜城北大石
忽摧人謂是其應云所著有空臆錄懷綽集居室
篇爲詩深厚如盛唐祀鄉賢

李鈿嘉靖閒由掾吏授增城縣丞慈惠愛民民甚親
之性廉介適烏寇掠海上郡邑戒嚴一日按訟者
一人納其貲贖民訝其改操逮暮碎其金攜登陴
悉犒守者蓋以日久恐懈故勞而固之也其通變
類如此尤敏練有幹局會郡築邏城甚急諸司檄
鈿董其役築者歌焉又從督撫進討兩源及置龍
門使鈿往視形勢鈿盡圖其要害上司嘆異後轉
布政司經歷

明元字可明號星洲孝友喜讀書隆慶丁卯戊辰

聯登進士授石埭令時政尚嚴明元獨以教化寬
易爲理省浮費清治獄裁減差使以節夫馬遷南
甸部郎有百戶者張居正同鄉人殺人於市主者
欲庇之明元執不可竟抵法出守南安設約要束
巡行勸課溺女做俗先是天順閒大庾學併入郡
學中而道源書院爲居正所裁明元入覲具疏奏
復大庾學及書院詔下撫按竟如其請遷貴州按
察副使諸苗怙亂潛畫方略逆酋相次受縛因爲
建衛設防浚河徙民諸綱繆甚具遷廣西參政卒

於官所治皆立祠有評註國語檀弓行世祀鄉賢
林一材享泥人初名一雉字以成號玉吾隆慶丁卯

舉人辛未進士授南禮部祠祭司主事於典禮多
所咨詢勒成篇帙陞郎中復除戶部河南司郎中

裁宗藩額外陳乞又題糧額必準弘治十三年例
不許浮增邀功時張居正方行文量法一材倡議

無浮燿州縣不得槩丈以滋擾擢太平守革鹽號
以惠商分稅契於屬邑郡俗多誣命之獄爲細辨

折嚴遣償澆俗頓革遷浙江副使備兵金衢則重

繼永康之婪吏譁聞豫備之倉穀卽上官側目不顧晉雲南參政裁軍伴分礦稅臨元一道遂爲冷局滇撫蕭公以邊才薦調山西參政以媒孽左遷冀南副使訓練綢繆引馬泡泉入學宮設立名籍以束宗藩以親老乞近地尋擢廣西參政艱歸汾人建生祠祀焉一材樸心質貌不干外事至地方利病則侃侃不諱如奸商以溷鹽爲官場謀設運同分司總之又如浦頭河泊安民巡檢皆害多於利者力陳其弊於當事而疏汰之至今便焉屢膺

賓禮年七十九卒祀鄉賢

洪邦光字世龍號賓吾父居正以貢司訓武進有學
行邦光嘉靖戊午舉人隆慶戊辰進士性沈靜簡
默望之恂恂然至其爲政度民便利竭蹶成之初
守無爲州州除養馬免糧田外一切歲辦不均民
困賦役流移者數邦光履畝均田酌議申請分秋
糧夏麥絲絹糖油四則以稅糧馬價照畝均攤自
後垂爲定例民大便之擢同知雲南府理他郡訟
獄錢糧悉得其平所過肅然亦無交往時太宰嚴

公清熟邦光治狀曰是當專城以理吾郡者已命
下果然刑清政簡士民安之秩滿陞貴州副使備
兵都勻樂平司叛苗樂禮生挾士官宋廷瓚夙仇
糾衆反流毒甚慘邦光率知府梁相集兵剷除與
指揮婁聯璧揚威定計擒禮生誅之宣示威信於
是樂平者牙九股等叛苗各奉約束久之擢參政
尋擢按察使備兵川東屬有土司跋扈督府將兵
之邦光謂是蠢爾者招撫可服躬至其境勘處土
司感泣聽命邦光在都勻時嘗條地方事失僚長

意已僚長撫黔修隙因以黔藩事論調邦光念父
母老馳至家杜門掃軌朝夕侍奉未幾卒所著有
三則要言祀鄉賢

李文簡字志可號質所嘉靖戊午舉人隆慶戊辰進
士知無爲州撫綏安利不搏擊以取名然法所不
可萬夫不能奪地當街道能節約困者以舒遷肇
慶府同知州人擁道攀留肇爲制軍開府地重劇
事多屬辦批卻導窾恢恢游刃總督石汀殷公宏
才大略文簡以謹節濟之不斤斤希指而殷敬重

之郡縣缺必委署焉治一如無爲會征羅旁以監
軍在行督勦決策厥勞懋焉臺使薦牘有貌古於
僧署清於寺之語人以爲實錄秩滿入爲南戶部
山西司郎中卒於官未竟厥施士論惜之祀鄉賢
陳榮選字克舉號鼇海健孫榮祖弟萬歷丙子順天
鄉薦初選劍州牧未行丁內艱復補儋州別戶數
清訟獄申六諭勸農桑建欽恤堂於蘇長公之載
酒堂傍率士子講學其中有拾金者爭首發榮選
斷歸拾者而責首者曰天賜彼金不平何爲稅璫

權稅驛騷民苦之榮選故饒資重義運家中貲以
應徵役不賦民戶不費官帑民戴德出望外黎人
梗化撫而招之不用命就俘者察其輕冒縱而釋
之題其刺而讞之牘曰冥積遷廣州同知攝篆香
山海泊所湊夷寶所聚清介一如平昔稅璫欲多
稅額榮選爲香山人力爭侃侃披陳一洗同官脂
韋之習見璫意形於色遂棄官歸榮選歷官州牧
府佐父老並扃城邊裝遮道泣畱儋廣人皆祀之
而儋人夫思尤甚與陳節潘楠合祀稱爲三賢祠

在家孝友好施出爲人後事其父母並隆所生里人黃姓有兄弟爭死之誼久繫獄中白而出之衣不重彩食無兼肉有以緩急相叩靡不應者居恒手不釋卷車途客舍莫不挾冊自隨所著有易四書旨禮記集註南華經道德經註解祀鄉賢

黃文炳字懋新善書能詩萬歷癸酉舉人丁丑進士任東陽知縣爲民履畝以免賄累擢南戶部權淮安關關陳紫峯琛舊所權處也文炳至署其堂曰仰止其行政皆師之擢守平樂政治持大體開賓

興修縣志獐獐子弟擇其通文者束以青衿皆瞿
然向化置驛馬復餘田民甚德之擢雲南副使署
督學事礦使鄭某虐焰殃及諸生意欲主司詰治
以謝之文炳不可遂矯誣論劾先後列二狀獨蒙
溫旨且詔礦使無生事時稍忤中使者輒被逮繫
恩宥自文炳始遷陝西參政卒

蔡用明本名霽字用明以字行更字晦仲號見南萬
歷己卯舉人初授大田教諭旋補長泰敘士範士
俱有禮法陞樂至知縣修學課士縣有採木之役

大木所產皆邊夷焚道岡壑箐崖絕人跡去治所
數千里故事給官鋤募民役先是多相冒規免展
轉株累又民苦先出募錢事竣竟不得官給往往
破家用明下車見耆老人給小方令疏注鄉之巨
戶各以所臆疾書毋得交語既上爲參稽糧冊閱
其丁賦之上下比證甲牌覆其廛居之多寡然後
榜示占役者姓名於縣門丁弱賦強則賦其金募
人不任者許自訴而蠲其實者扶其誣服與妄求
免者乃更爲立補助之條定番休之規信給領之

令往役者官護其家禁奸民毋乘出造獄擾之木
分三運以十之六爲及格最後乃滿十採木已邑
中早疫相繼用明按籍勤撫以紓之優禮百年黎
民价予冠帶歲時致餼課士出俸錫供筆札茗饌
而大作新其廟學豪猾犯科求贖不許必痛懲部
使徵無礙金據理折之氣短而止遷淮府審理未
行又有征播之役大發民夫餽餉用明猶精心爲
之部署行伍相補助戒以緩急相扞如其初至調
度採木時督木使者過縣民擁車言令治狀涕泣

刑臣軫不得發臨行獲奏記督學請廣多士解額
及發舟泛裝岸石以壓險陸績鬱林非虛語也子
復一

張日益應星子萬歷壬午舉人令靈壁始至下寬恤
之令興利除弊務殫其馘時河工興作動派里夫
民苦額外之征十室九竄日益申文臺司第用帑
金招募或願赴役者如數復其身上司急催役日
益具靈壁飢窮狀請寬之以賦不及格轉王官老
幼泣送之爲立去思碑

王道顯字當世號瞻明從紫溪蘇濬遊邃於易萬歷
乙卯舉人癸未進士任台州司理慮囚多平反署
府篆及天台黃巖太平等邑俱有政聲入爲御史
卽抗疏劾兵部尚書王鶚失邊備請以王遴代所
條陳悉中機宜出爲青州僉事青故多響馬好劫
鬪道顯設法擒治爲之少變遷雲南參議丁內艱
歸民尸祝之起浙江兵備肅衛伍核才官倭寇聞
風遠遁遷湖廣按察使解組杜門著書得理學之

傳卒祀鄉賢

張繼桂字廷高鳳徵子由龍溪學中式萬歷戊子舉
人乙未進士篤親信友意氣倜儻授華亭知縣裁
罷常例不避權勢調松陽神明豈弟均役清田催
科聽訟鞭扑不施而賦額無逋教化大行卒於官
歸櫬後家中蕭然妻孥織作自贍華松二縣祀之
名宦

劉夢松字國夏號璘蒼萬歷戊子舉人乙未進士父
存德仕廣東副使善大書工古文詞夢松教授揚
州歷國子助教刑部主事恤刑廣西陞員外郎中

尋知台州府善政宜人台人祠祀之遷江西按察副使秩未滿致仕卒祀鄉賢弟夢潮乙未進士

蔡獻臣字體國號虛臺浙臬貴易子萬歷戊子第二
名舉人已丑聯進士授刑部主事時帝久不視朝
抗疏請定國儲忠愛懇切言人所不敢言諸所獻
理一歸明允司寇王元美稱爲用世才調兵部職
方主事推補將弁惟才遷禮部主客郎中四方朝
貢一依典制調儀制司郎冬至習儀臺省爭班獻
臣力執舊典復論楚藩假子事忤右宗伯意宗伯

遽罷深頷之已又疏請福藩之國鄭貴妃恚甚夜
發內使執之曾不少屈及旦以舊典爭於帝前帝
心嘉其直遣出常鎮參政旋遷湖廣按察使有為
宗伯修憾者借楚事參劾削秩罷歸百姓遮畱立
祠口祝抵家讀書東山修韓邑乘尋起浙江海道
陞浙省督學天啓中擢光祿寺少卿乃歸而樹德
於鄉邑有海豐莊田受產二百八十餘畝上有朱
埭一決則下貽患於海豐屢築屢壞訖無成功獻
臣慨然董其役第田爲三等曰崩流漫漲沙壓以

次出貲凡築石岸千九百八十餘丈於是朱埭歲
以有收而海豐曰永保無事農人業戶頌功無既
請何喬遠爲文勒碑紀焉著有清白堂稿仕學潛
學講義筆記等稿年七十九卒贈少司寇祀鄉賢

黃華秀字居約入南安庠萬歷戊子己丑聯捷進士
授韶州府推官逮下仁慈事上端執精明決斷雪
殺姑之冤釋代兄之囚辨伐冢之詭以最薦召爲
南京浙江道御史剛果洞達條陳時事時東方有
遼左之慮中原有礦稅之興楚藩有小人之構華

秀皆上疏極言之官殿從德興祝世祿寧國張應
泰潛江歐陽東鳳及郡人李范廉駱日升爲讀書
之會相切劘如諸生卒於官不餘一錢諸公經紀
之

郭日烜字宗實號旭東萬歷癸酉舉人已丑進士授
嘉定州牧歸奉母就養州轄六邑故稱善地有坊
里之供會長之金又有諸稅之貯州帑歲可得三
千緡日烜槩謝卻之會免差不靖率督兵馬招討
收捕擒獲六邑精以安堵蒞任甫年餘循聲播川

南獨以執法不阿屬員縉紳不無齟齬壬辰計後
臺使有拾其短者主爵意難之而重違言者乃量
移安寧州牧覲行畱子奉母嘉邸至是母念歸急
乃溯江入楚而日烜及長子基迎之荊州跪請母
前欲乞養歸母不可日烜不忍別母奉與偕行至
龍津卒年四十八僅遺圖書數卷周身幾不能備
焉

陳基虞字志華號賓門萬歷己丑進士性孝友鷺直
寡諧初除蕭山令以忤津要左遷移南雄府推官

有橋權稅歲入萬金力辭不染署篆新會稅監負
嶼徧爲蠹尾士民大變基虞保靖之辨首盜諸家
冤誣活數百命前令如光斗附增虐民增重餉急
催科基虞悉心調劑民賴以安代之日焚香臥轍
迫擁不前與袁王二令並祀三賢祠晉南刑曹郎
有貴人欲軋一異己者基虞堅持不可乃得解歷
守二郡人多去思刺彰德時畿輔猝警大中丞范
景文戴星入援基虞措置軍需咄嗟立辦朝野賴
之擢粵東兵憲終以不媚權貴得調捐金倡修長

與第三橋行人賴之卒年七十九

柯鳳翔字志德號桐岡萬歷戊子第四名經魁己丑
聯第進士授刑部四川司主事尋擢員外陞郎中
出爲平樂守丁內艱服除補贛州府守調慶遠守
擢兩浙都轉運使以年老罷歸鳳翔坦衷質貌不
矜能不藏機行已居官兢兢不爽尺寸其爲刑曹
多所平反法所不可者雖權貴居閒不稍動三棺
郡符持大體不苛細至爲運轉則嗟蠹剔抉殆盡
而守贛時亦辭榷務不染指以故虔人愛之粵浙

人頌之第以不能屈意徇上官計吏歸抵家居墩
柄里第不入城市脫巾曳履莫知爲貴人也天性
孝友常斥五百金置始祖祠及祭田族中飢寒者
濟之意氣窮交始終綢繆卽相背負不問藉以殯
葬者六七家少年陵侮者不求報窮人負債者不
責逋童僕有過怒而譴之不加撻能改亦納之一
錢尺土未嘗有利於人卽操券求售者必屢所欲
去年七十九卒崇禎四年學使者何公奏請崇祀

鄉賢

陳則采號對墀萬歷辛卯舉人初任應城知縣以終
養告歸復任揭揚首敦學校造就人才有惠愛揭
人立祠祀焉遷至府長史不赴卒年六十九

胡明佐字良甫號拱柱萬歷壬午舉人壬辰進士授
南城令爲政不事粉飾不求名譽癸丑洪水淹沒
萬家瘞亡恤存民沾其惠建太平橋爲民利涉縣
多莊田賦役苦累明佐力請編運行均糧之法著
權宜永猷二錄後人遵行民賴之調宜城令曠事
起瑄悍莫與撻明佐爲陳地妨顯陵右臂瑄懼謝

去一邑以寧陞計部出守循州有巨盜出沒惠潮
設法平之累遷山東參政以不媚權貴歸卒年七
十有三

林應翔字源澠號負蒼後更號止巖萬歷甲午順天
鄉薦乙未聯第進士知永嘉縣歲旱縞衣躡屩迎
龍母五十里外雨大沛丁外艱起補京山巡勸課
停車決訟不使至庭楚藩構逆郢中騷動練兵葺
城遷南戶部郎督儲鳳陽出守汝寧汝黃之交有
巨盜號自在王應翔殲之調廣州決積牘千六百

卷平反死獄八十餘一日以聞廣聞糴爭議棄官歸復起衢州爲龍游民陳利病罷協濟米訪擒劇盜滕奇兄翁覆其巢穴開化有程五龍等盜戕殺官兵使者發兵捕治近村民惶惑鼓譟逐之兵歸告使者村之千餘家盡勝廣也應翔曰無恐獨入巢繫其戎會烏合悉散良民得全省像祀之遷湖廣副使未之官卒年六十二應翔好道術兼通程氏所著有止齋存稿

陳穀字次卿一字式洲號天桓健會孫萬歷庚子舉

人榜名士佐初授無錫教諭有知人鑒擢廣東新安令剛直廉平首除劇惡嚴詰奸胥寬里甲恤編民免贖醵清羨餘積蠹宿弊釐剔殆盡築兩炮臺於城北隅以固守禦甫年餘以忤權貴去行李蕭然父老攀號遮道車不得前民思其德祠於南頭西鄉後補藍山令勤於撫綏民有寧一之頌既歸年六十九卒於家

蔡鍾有字恒卿萬曆癸卯舉人授興國令嫻於吏職能得物情邑黠訟者託他籍徧控關提淆亂請於

上官痛釐治之永樂中屯田至成宏開漸蕪府檄
召民墾荒給帖爲業已墾者軍復爭之前令何應
彪以刁軍害民請禁未久復爭郡守金汝嘉頗庇
軍鍾有條陳源委言多切中守不能易卒以阻道
不容於時左遷徐州倅守呂梁河堤河漫決無時
奔漲疾風乘舫行波中幾葬魚腹者屢山東妖寇
發去徐三十里鍾有以河夫爲卒畚鍤爲兵拒賊
河上賊北潰走轉分水令卒官

織若字時育萬歷甲辰進士筮仕提刑讞獄詳慎

聖書褒榮之累陞司憲兩粵有巨盜鄭誅歷年寇
害閩浙江淮閒織若懸貲購黨擒之諸路悉平及
權璫竊柄有議以澹臺子羽廟以建魏祠者織若
力排不許事遂寢未幾歸卒祀鄉賢

蔣芳鏞字任坦萬歷丁未進士初授戶部主事差管
海運新泰二倉聞父病卽請假歸省補工部營繕
晉虞衡督寶源局出守建昌以明斷失權貴意移
衡州時安奢作梗徵兵徵餉徵運衡民苦之芳鏞
至開鼓鑄代餉歲省民輸萬金復捐俸賑饑刷冊

均糧通漕鹽罷浦米蔭湘薇峙皆立祠焉擢郴桂
憲副未及涖而卒

池顯京字致夫浴德子善文章工書畫萬歷己酉舉
人授和州知州州有牛竈歲入千金胥役又故橫
暴一紙下鄉輒盡中人數家之產顯京至官首革
牛稅剗設木皂州人便之旋忤巡按崔呈秀左遷
湖州通判後陞懷慶同知以疾歸卒於官

宗載字允坤號亨萬萬歷己酉舉人榜名巖言丙
辰進士初令浮梁有無賴緣璫棍獻民間田產假

爲上用一邑惶駭宗載察其奸狀置之法釐剔糧
弊人服其精明天啓初以治刑入爲兵科給事中
歷戶刑左右進戶科都給事時邊費無度山海餉
費月二十九萬宗載請旨查檄省去七萬又疏因
餉檄兵因兵檄官侃侃切中時弊進太僕卿攝太
常事莊烈帝卽位祭告郊廟陵寢諸大典皆宗載
秩之陞大常寺卿疏乞終養歸書還淳二字於里
閭優游泉石者十餘年年七十卒祀鄉賢

周家椿號愛日萬歷丙午舉人庚戌進士授寧波推

官丰采英邁剖決如流攝郡篆並署鄞縣執要除

繁庶務咸理捐餼置田於郡庠士民德之丁母艱

歸起紹興推官時浙中鹽課半出紹興家椿檢額

外羨金歲可數千悉汰革之推司理第一分校兩

省得士九人如馮元颺元颺祁彪佳余煌章正宸

皆名士有操行擢吏部主事歷員外郎中屏絕私

謁過吳門哭周忠介公而去惜名器破積習如寶

城大工諸職多由內授特加裁抑時邊疏多歸功

魏璫力折眾議不少折節舉貢候選多淹滯家椿

謂此非國家待士意將疏通之而修却者藉爲口實遂掛冠旣事白終不出

周爾發字子祥萬歷庚子舉人庚戌進士初令吳縣均賦革羨捐俸修學置田贍士署長州調歙縣張弛如吳秩滿陞禮部主事神宗遺詔欲用鄭妃爲后據禮執奏事竟寢光宗大漸召侍湯藥偕勳臣禮臣入直禁中奉願命識認太子時爾發以祠祭司兼掌四司事凡大喪大慶郊祀賓嘉及光廟擇陵熹廟擇婚諸大禮儀皆綜理無錯司獻南理督

南糧節制南軍措置得宜前後凡九賜金六錫命
時人榮之終南京兆丞卒年五十九

陳如松字白南萬歷壬子順天舉人授蕭山令革常
例除罪贖嘗坐公庭自未至酉連判三十五事無
稱冤者嚴盜賊摘伏如神有被殺者無踪疏邑城
隍犯忽自到爲民興利而抑富豪以邑水東去不
利民財乃築壩截其流別開雙河滕使水折而南
注遶出大通橋又北注以遶於舊道凡爲橋三建
塔一朱直指稱其吏治爲浙中第一以忤上官調

簡補信宜旋改河源邑學宮爲勢官占營私室如
松立毀其室復之有泡泉宦據焉如松曰山川之
靈豈供凶人口腹投筆泉水立涸擢守太倉事無
劇易立解治訟大者爲勸解小者斥去之候臺司
出餒則攜袖中錢市糲食供帳上官簡脫雖譴責
不動嘗試童子卷千餘一日夜發榜遺者求續問
姓名誦其疵句皆走匿書法名家人乞書立應二
年拂衣去瀟洒不羈所著有蓮山集語抄學庸解
百篇詩老來吟諸稿

蘇寅賓字初仲號曰門萬歷壬子舉人已未進士授
崑山令時螻螻食禾遍滿田墜寅賓禱天爲民請
命螻去歲以大熟以執法失權貴意論貶寧波府
教授崑民祠之秩滿陞國子監助教累遷海南兵
備道革納鏹積穀諸羨餘勒石永記轉湖廣糧儲
道以不謁督糧權璫奪職歸家無僭石杖履自適
卒年八十一

張朝綱字思勸號楚臺一號五孳九歲能文萬歷丙
午舉人丙辰進士初授麗水令巨猾斂跡以最調

永嘉有以白金假海鮓獻者召卻之適富人子殺人善事郡守諸縣長承守旨久不問朝綱治如法卒見忤歸五載起金谿令邑有虎患爲請命於神虎就斃分校浙闈所得皆名士陞戶部雲南司主事管新泰二倉監兌兩浙旋授正郎出爲廣西副使備兵蒼梧梧當兩粵衝獠寇出沒勤團練募義勇粵賴以安署藩篆凜凜冰霜其在營衛屯伍市澳船廠經理有法民立祠以祭梧吏有祠自朝綱始卒於官崇祀府鄉賢

康爾韞字叔玉萬曆己酉舉人己未進士授戶部主
事督河西稅課羨餘不染毫釐歷郎中管通州廳
時水淺舟行膠糧餉不前爾韞親履河干立風雪
中督之得挽運如期以不謁權貴出知兗州府清
獄理冤汰役革耗旱蝗俱不爲災以積勞成疾告
歸

葉成章字國文號慕同萬曆壬子舉人己未進士性
嚴毅令長洲初至漫不省事人呼爲葉木頭旣而
判決如流錢穀利弊洞若觀火於是革陋政節官

費絕包攬取其奸之尤者重劄之吏胥屏息徵則
不輕差一人亦不輕議一重辟獄訟清簡以廉能
召試御史屢獻直言有培元氣慰忠魂諸疏按宣
大兼學政陳邊防十策上嘉納褒賜差按江右陞
辭有聖度宜優詢謀宜廣疏及行部則飭闡規蒐
方俊禮名紳謹聖學捐贖醵以賑飢民境內肅然
督應天學士習文體一軌於正所拔士多顯達遷
大理寺卿以執法獲戾權璫削籍家居二載朝議
召用而成章已逝嘗有言曰吾智不能敏給而持

之以慎才不能揮霍而積之以勤其用心如此祀
鄉賢

劉夢潮字國壯號海若存德子夢松弟萬歷己未進
士少孤守約奉母命南昌設法捕盜旁邑以寧改
北京武學教授著十三篇註解擢禮部儀制司抗
疏糾瑞轉主客司朝鮮入貢以故事送土物閱之
乃璞玉也直五百金卻之遷粵西副使分司蒼桺
地去長安遠吏以苞苴爲故事夢潮操冰檄復卻
三江權稅歲累千金三院廉之委署學篆有家門

宿怨爲蒼梧屬吏夢潮以直報之自是釋憾修睦
邑里稱爲長厚君子卒於官著易義畫前稿行世
祀鄉賢子霖任舉人孫望齡進士

劉廷憲字秋岳天啓辛酉舉人初署沙縣教諭新

文廟勤月課人文蔚起諸生爲建生祠於學宮之
右陞桐鄉令清慎執法汰耗鋤猾每簿書暇卽與
諸生講學課文所賞識多名士歸官後桐人建祠
於皂林驛祀之卒祀鄉賢

黃其晟字芝仲號元眉時薰子先世自錦宅遷居鼎

尾天啓壬戌進士由內閣中書擢東城御史以抗
直不容出知撫州南昌桂林等府有善政郡民祠
之轉陞南寧道嗣聞懷宗之變同瞿式耜呂大器
等奉明藩於肇慶嗣知天命有歸從王遁入緬甸
爲我朝兵所獲錮獄六年國家恤其無罪至
康熙壬寅

詔釋之錦里初祖祀田不足置產業充之鰲島渡祖
祠爲世家所占爲之清復焉性喜楚詞漢書嘗題
句云熟讀離騷痛飲酒細看傳註喜觀書可想見

其胸次矣

陳昌文字伯武天啓壬戌進士授平樂司李治尚寬和在粵九載歷署諸篆人誦爲九印召杜擢南刑科士民遮道轉北吏垣疏請各郡邑立倉令縉紳捐粟以備賑劾尚書張鳳翼防西失職狀未幾卒

官

盧經字得一萬歷壬子舉人天啓乙丑進士初授行人陞侍御史巡按河南有宗室萊陽王者以受獻孥一諸生到府楚掠經甫下車卽明斷其曲王懼

遣長史求勿疏弗許竟以此獲譴下詔獄少宗伯
陳子壯科臣李汝璈等皆特疏申救始得論戍放
歸年七十有九

陳文瑞字應萃號同凡萬歷戊午舉人天啓乙丑進
士授吳縣令潔已字以五載戴星按獄持法推情
豪貴莫敢撓於乳獨尤加惠焉事上不諂過客騷
擾必抑之浚縣治前學宮內外各河盡清所占喜
親賢士大夫兩分校咨聞解元沈幾楊廷樞皆其
所取士也吳當漕孔道慮阻凍後期議借民力代

運文瑞執不可事得寢時天下多故部議視產上
下募兵充伍文瑞以家丁隸名民乃帖然洞庭有
號天罡者結黨橫行密緝而置之法其黨盡散周
順昌罹璫禍義民顏佩韋等數萬人以激憤捽緹
校文瑞護周出境復捐俸倡助爲輸所誣贓仍撫
卹其家苦心調解郡人默受其惠及佩韋等首事
五人被誅爲葬而立之石曰五丈夫墓吳人有金
剛手菩提心之謠前後疏薦卓異者三竟以不樂
逢迎致仕歸卒年八十有四

張璫字望之號知非崇禎庚午舉人甲戌進士授萬

州牧首務教民建社學十餘所革陋規及板榔園

稅數千金有生黎出沒害民計擒其魁患悉平以

異畱任五載爲屬邑久滿累謫楊州鹽運判官尋

陞瓊州推官有宦豪虐民置之法諸惡斂手陞南

戶部主事晉北戶部郎中揭奏奸相錢弊召對稱

旨勅差粵道糧餉聞變歸著有蕘對草家乘引考

等集卒年六十有九

蔡國光字士觀號賁服天啓丁卯第六名舉人崇禎

甲戌進士七歲就傅經史過目輒成誦既釋褐令
高安請免浮糧革除常例高安人建祠祀之已補
鉅鹿修城池給牛種殘疆之民實賴以安召對稱
旨擢授禮垣未幾李自成陷京師執國光使降國
光嘆曰吾不能捐軀從先帝於地下尚敢覩顏更
事哉賊拷掠極楚索其財從者貸與之始釋歸焉
卒年八十有三

林鳳儀字朝陽崇禎癸酉舉人丁丑進士授戶部主
事遷員外郎掌三司郎中事點給京衛月糧按籍

皆虛冒白大司農不入告憂憤欲掛冠適青州旱
蝗盜起擢鳳儀出守下車虔禱甘雨立澍釐蠹弊
釋滯獄寬贖醵是歲蝗不入境以校士嚴絕干牘
巨室憾之值鹺使者苛責款迎遂告歸中丞欲疏
畱之方辭抵家僅圖書數篋曰吾以清白遺子孫
卒年八十有六

張朝縱字思藻號青武崇禎己卯舉人庚辰進士授
職方司主事抗疏清核京衛官糧數十餘萬陞郎
中典試廣西轉江西湖西道駐袁州時郡北有天

升窩強賊盤據民遭荼毒歷任監司勦撫兩困朝
縋單騎抵穴開諭盜盡解甲陞雲南督學民爲之
攀輿因畱任尋撫南贛清勤自矢後歸以病卒

郭貞一崇禎庚辰進士授行人擢監察御史立朝侃
侃所建白多切時弊丙戌後歸隱卒年八十一

盧若騰字牧洲崇禎丙子舉人庚辰進士御試召對
稱旨授兵部主事時閣臣楊嗣昌督師湖廣好作
佛事祈福若騰疏參嗣昌不能討賊只圖佞佛帝
以新進小臣妄詆元輔嚴旨切責時論壯之遷寧

波巡海道僉事疏糾權璫田國興攬帶貨船濫用
人夫辱州縣阻閘口有旨召國興回論如法居官
潔已惠民剔奸弊抑勢豪峻絕餽遺輕省贖鍰風
裁凜凜值胡乘龍盜起從容指顧旬日閒兇渠擢
首閩井晏然有功於浙浙人祠之歷久不廢歷鳳
陽巡撫甲申變後與癸未進士沈佺期許吉燦等
同渡海隱於臺灣勵節終身卒年六十六所
方輿圖考浯洲節烈傳及詩稿文集

陳觀泰榜名琬字允雅號上庵崇禎癸酉舉人寬厚
孝友 國朝任儀封知縣聽訟持平催科不擾緝
劇盜卻飛蝗捐修學宮完雉堞除雜稅革陋規儀
人德而祀之及子睿思登第遂告歸建祠宇置儒
租百六十餘石以勵孫曾卒年八十祀鄉賢

劉望齡字爾三順治戊戌進士 授開封府推官以

執法左遷雲龍州州判歷宦十三載一清如水丁

父艱歸

劉佺齡字偃仙霖任子順治庚子鄉試第二名令南

陽勤撫字拙催科稱爲劉菩薩退休之後蕭然自得不入公門後生奉爲文章模楷

陳睿思字子將號鶴屏又號宜亭觀泰子康熙丁未進士授中書舍人耿逆變請假歸省入都未幾回籍守制捐資倡修輪山朱子講堂進文學之士課藝甲乙之起補原職時清丈界外田畝解部溢額數百頃睿思以瀕海風高地瘠婉陳崩壓無時狀得照舊額勻輸轉行人修同安會館奉

詔回閩公接之暇未嘗與有司通一刺晉戶部主事

值聞粵海運議起睿思謂航海波濤不測非河漕
比力爭之議遂寢出理西倉釐剔勞憊卒於官年
七十著有可園詩文集子肇俊康熙乙酉舉人

劉球璜字子玉號惠菴積善塘源人都督同欽子康
熙八年由優貢選華亭丞以最陞令任九載勤政
恤民錢糧有不完者察其貧困捐俸貸贖積以萬
計歲大祲請帑散賑不敷則捐貲以助廢已產數
萬金活人甚眾大尹首薦賢能以疾卒邑人哭送
甚悲建祠祀之

張金友字聲子從順里西塘人九歲能詩父斯燠名諸生也日課以經史數千字皆成誦年十六而孤遭兵燹託鎮軍幕府以自庇會草檄以廿年少不之秘也友從旁言其不可鎮軍大驚卽囑署稿果稱意由是器重之其母聞之曰童子饒舌禍胎從此始矣乃自韜晦後海氛再熾逆帥聞其名欲致之因竄匿安溪山谷中數年迨閩疆底定登康熙庚申補科賢書初選得湖廣司理會 國家裁汰

是官改補仙遊教諭時有縣胥陵諸生訟之宰宰

右其胥欲以闕堂罪褫諸生友力持不可旣而將
交顛於上官因從容謂宰曰如此必皆有譴第某
黜爲愛士公黜爲庇役輕重之際願明公熟思之
宰爲改容乃直諸生又有郡司馬攝縣篆欲於縣
堂責士友爭曰法此地無責士體恐後以爲例公
何忍焉亦得罷巡撫李公以友賢疏薦之友請歸
養李不憚因備言母老屢經播竄甫獲息喘不忍
遽離狀李爲之泣下乃歸仙遊人勒石以志不忘
居鄉排難解紛族姓無煩有司判牘者人咸重之

稱爲旋圃先生旋圃者友之書齋也年七十五卒
子迪太學生工琴善弈書法更精於繪事至今得
其片紙猶值數金終身不履公庭以高行見稱云
洪心澄康熙丙子舉人任偃師令丁外艱歸服除值
臺匪朱一貴竊發提督施世驃延入幕中贊畫制
勝多出其謀事平未議叙而卒

陳還號素亭永華孫由正白旗應順天鄉試登康熙
庚辰進士任開平令有廉能聲丁內艱數月而開
平山寇竊發勢方熾制軍楊公亟召還往撫之不

旬日而平題敘授督標前營參將總督孔公改題肇慶府同知以勞瘁卒於官

池繼善字曦侯康熙戊子舉人授達州州同有惠政卒於官歸櫬無資士民爭贖之達州志稱其學問淵深經術優裕

莊仰旻字彥三號仁軒積善里莊坂尾人康熙庚午舉人乾隆丁巳以明通爲南平教諭先賢李侗後裔衰微只有男女二人俱沒爲富家奴婢仰旻捐俸募金贖歸女配於庠生某爲妻男則爲之籲請

督學吳莘孫取列膠庠又獻治臺十二策於制府
德公德採用之遷增城縣令聽訟無畱滯及解組
歸縣之羅漢峯被土豪鑿石挑砂請邑令立碑禁
之

洪淳瑛康熙甲午舉人授六合令調儀徵革陋規矢
冰蘖剔奸除弊吏畏民懷家居足跡不入城市

郭展綖字紫垂積善寮東人補莒州州同莒巖疆多
響馬泣任卽設計擒獲王四陳大等二十餘人杖

斃之行旅又安護理州務兼攝沂縣事慎刑簡役

窮無告者加意撫綏丁艱歸莒民無不垂涕

林雲嵐字龍輔號定軒廈門人康熙丁酉鄉薦任江
西瀘溪縣邑有漕米三千舊例每石折銀七錢納
官代辦後價昂貴官藉以侵牟雲嵐因時價採辦
民免其累癸亥江右飢將常平積貯不照糶三存
七爲例申請權變糶七存三多方籌畫邑賴以安

陳鵬南字雲垂號淑齋康熙己亥年臺灣歲貢四世
同居無閒言任連江訓導邑河久淤捐銀六百兩
疏濬之乾隆二年風災文廟傾圮殆盡鵬南運

家貲二千四百兩獨力脩建歲飢邑介戚毀言煮
粥賑濟鵬南捐米助之又勸紳士輸穀運米於明
倫堂平糶接濟又偕令竭力搜羅輯成連江縣志
制撫上其事晉秩褒嘉請告歸連人伐石記功建
生祠祀歿後爲呈請祀名宦

劉承業字垂恢號鶴田祖劉澳徙白石遷居鷺島少
警敏好學乾隆戊辰進士選鉛山令冰蘖自矢理
繁治劇勤聽斷不屑逢迎翫法有民婦被污不就
憤恚自盡其翁受賕以溺死鬻獄承業廉其狀置

法請旌邑饑奉檄發粟三千石行賑目以拯濟

不敷發六千石復捐廉俸拮据墊補民沾實惠邑
早步禱甘霖立沛重新鵝湖書院振興文教竟以
勤民履勘卒於旅邸承業於書無所不讀文笙簧
六籍機杼一家傲岸自雄直欲開拓萬古雅擅兼
才字樞虞歐札彷彿蘇黃詩詞出入王孟秦柳凡所
作必正容端筆楮香墨活至其性地恬粹飲人以
和望其丰采矜平躁釋年甫冠以義經魁閩省內
外場皆奇肆主司歎爲異上殿試以得卷晚置二

甲平生口碑轟傳人耳聞其歿咸惋惜云

林翼池字鳳賓號警齋嘉禾里人雍正壬子舉人乾隆

乙丑進士選湖北來鳳令縣係苗疆新闢甫下

車卽請建城郭興學校躬親考課民始知學來俗

聘禮只用鷄酒每致強婚滋訟頒示婚函印記執

據而男女正民居父母喪旣除服遂焚主廢祀教

以奉龕藏主歲時致祭而民知孝邑苦鹽食價倍

於米商人年繳例金八百兩卻而不受勒石平價

民食其德來毗西陽州爭界仇殺詎勘釐定地方

以寧邑未有志捐俸創修獨出手裁以終養歸百姓莫不來贈劉寵之綫願借寇君之年攀轅祖餞墜淚豎碑生平著有尙書捷解讀史約覽洲拾草遠遊閒居草知以集行世

劉瀚字景若號溪堂東橋人乾隆癸酉科舉人爲學以經濟時務爲重經史外旁及象緯輿地指畫瞭如遇事持重有沉識身世調度歸於敦本尙實初任建安教諭脩學課士試於鄉者遂多獲雋學兩齋有額穀百餘石胥斗匿之數十年瀚廉問得底

本盡清出調龍溪學再調臺灣彰化學楷模端重
 士翕然稱之天性孝友在建安龍溪皆迎其母及
 嫡兄欣聚於署選興安令地當衝徭獠雜處刁訟
 浮民瀚正躬以率恩威互用帖如也治務寧人鄰
 封全州歲應採木造浮梁送省值水漂沒州牧請
 檄興安幫造瀚以因循為例將累民疊文寢格之
 歲連旱大饑發各社倉聽民貸約豐年繳還僚佐
 幕客危之更迭諫皆謝邵口用此獲罪吾無憾焉
 時民朝夕轉溝壑得貸穀全活以萬計越歲少稔

衆咸瀚恩爭負戴真舍不匝旬而還如額在興七
年次第張弛自出鏹爲興人畫規模重建學官所
屬陡河三十六所秦史祿所開南通瀕水北引湘
源水運要津也久坍塌舟步底滯無議脩者瀚躬
覘地形計度程具其事上聞濬之水運由是通利
兩入鄉閭分校得士皆知名調署永寧州臨發興
士紳老幼攀號塞路揖別至暮始得登輿抵州任
未久丁母艱歸居鄉主壁自愛弗與請託掌教輪
山書院三年品望歸然爲諸生講解破疑竇或卽

會考題同作皆精的嚴密獨出心裁素不喜爲名
詩文脫稿傳觀輒任散失子姪撫拾得古文二十
餘首時文四十餘首詩二百餘首藏於家卒年七

十三

陳鳴珮字雨若號紉蘭登瀛人副貢生思敬子由臺
灣府學廩貢生任建寧府訓導初署泰寧訓導仗
義慷慨修尊經閣濬久涸泮池引水入城以通其
脉繼攝連江篆祖鵬南嘗司訓其邑遺教在連連
人立祠祀焉鳴珮繩武傾貲重修 文廟飭備祭

器士人德之贈匾祖孫濟美製錦以榮其旋嗣調

龍溪學值臺匪竊發奉委解餉散給義民井井有

條寇平委辦善後事宜督造卡房稽查叛寇明敏

妥洽有不便於民者不殫剴切詳請彙梓賴焉時

鳳山 文廟遭兵燹當差務旁午出賃倡修撫軍

徐公深加器重薦膺民社議叙一等軍功隨帶加

一級應陞知縣素性恬淡不喜就職仍視龍溪學

事捐金九百有奇修 文廟建奎樓邑紳士僉集

名宦祠晉列祿位以誌不忘甲寅水災卒於官聞

者咸痛惜焉

武功

林天祥

郭濬

葉元齡

許福

邵應魁

莊渭陽

陳則睿

郭芝英

許盛

陳昂

吳楠

黃延

林莊雄

張正

魏平

王天貴

林宗泰

蔣燿

郭新

林永山

許忠

方劉進

方長生

劉執忠

吳陞

魏國泰

陳倫燭

胡貴

林君陞

高華松

陳燻

方文柱

柯連英

吳必達

蔡攀龍

葉時茂

元

林天祥字時若嘉天里人嘗司常平倉不屑升斗樂
自韜晦與漁樵伍會鄰賊掠其里避地往漳及歸
邑再有警則率里人築堡竭力捍禦老稚賴之爲
人內寬夷而外和易無迫阨之度蹠矯之容上則
交爲其誠下則各得其欲年六十八卒里人哀悼
如其所親

明

郭濬字文遜後郭人多謀畧宏治四年賊聚亂石碓嶺總兵官馬公聞其名命從征時賊勢猖獗莫能當其鋒濬奮不顧身率衆捕之有功諸大吏咸曰文遜雖無一命之寄然爲國之心則有不可磨者請於朝授冠帶以榮之

葉元齡秉乾孫嘉靖閒漳巔寇發元齡應與捧郡檄督機兵於上杭衝風冒雪蒙烟犯瘴涉歷巖崖荆棘閒與士卒同起居者幾一年旣而大兵四集齊

力奮討渠魁授首凶黨破滅上功論賞錫幣郡縣
卽家致勞邑人林希元爲序贈之

許福號西浦嘉靖戊子舉人乙未進士歸家養親幾
二十年值倭警團結鄉社邊方無虞未仕卒

邵應魁字偉長號榕齋幼穎慧弱冠操舉子業適僉
大猷來視金門所篆從之游遂徙業焉丙午雋武
闈丁未聯成進士同登武第自應魁始已授所鎮
撫贊畫南贛軍門贛多峒賊奉檄往諭賊以兵恐
之不動以妖治挑之復不動竟俯首聽撫歸報合

中丞疏薦其可大用乙卯倭犯浙詔徵天下材官

總制張公以應魁隸俞大猷幕下大猷喜曰仰撫

軍來倭不足平矣時倭勢猖獗應魁提兵據平望

橋以待比至以偏師遶其後追斬溺死千餘人中

丞張景賢奇之令統巨艦駐洋山島夷所出沒也

謀以衢山之急報疾趨之倭以二艘誘戰薄暮追

至蒲灣諸艘蝟起應魁率舟師乘風衝犁平明至

馬蹟創甚猶裹血奮呼殊死戰賊乃潰去大猷親

爲傅藥解衣仍令移師吳淞是時嘉定急則轉嘉

定上海急則轉上海江陰急又轉江陰敵無不攻
應魁無不應而川沙窪之擒斬尤多明年大猷晉
都督鎮浙乞應魁與俱懸賞得選鋒三百人犒之
令撓賊賊不動應魁曰是狃我也會大雪提三百
人披蓑持火藥夜半漸抵賊柵懸蓑藥之風發火
熾壁上下如赭大兵鼓譟進焉賊多焚死是役用
奇以少擊衆號爲冠軍於是總制胡公檄令督兵
黃窰港時倭大至天色已晚聯舟爲營應魁語諸
將曰乘其未定一鼓可擒也令我兵各標雙燈直

衝賊艘炮弩齊發呼聲振天賊焚溺死者無數餘
寇遁走茶山北洋窮力追之再戰再捷未幾謀報
倭將入七了港乃設伏賊後自以大兵迎敵戰酣
伏起夾擊大破之追至乍浦衝突沈倭艘二御史
上功陞南直隸遊兵把總兵部敍功復陞永寧衛
指揮使旋把總劉家河明年復把總圖山巡歷江
海不避風濤有倭至擊之三片沙沈其二舟斬首
甚多陞福建都司署都指揮僉事誥授昭勇將軍
封贈父祖如其官將赴閩而監軍唐順之移書撫

按請以閩銜領浙直事專守江南而倭闌入江北
總兵盧韓被劾詔獄波及應魁遂解職日與諸名
公賡詩倡和旣而劇賊曾一本橫行粵中總督吳
桂芳請以應魁參將廣惠潮提哨船不滿三十值
賊艘百餘乘夜截擊獨以中軍當其衝自寅及辰
督戰愈力手射殺賊圍乃解復合諸軍大戰破之
而閩巡按陳公爲粵人遽以未履閩任中應魁遂
求去歸而杜門卻掃校讐左史寄情詩酒大輪外
陽慈雲天馬諸山皆有標題孝友天性奉人恣伯

兄出入不問金明有園材之趣兄心欲之卽移家
豪山而推宅與兄巡憲及郡僚行部往返輒枉車
騎得其詩乃去然未嘗有所干年七十六卒著有
射法詩稿行世

涓陽萬歷癸未武進士授廣海守備陞濶州遊擊
以瓊州黎峒不靖題陞瓊崖參將有平黎功遷五
軍七營左參將告養歸卒瓊州人祀之名宦

陳則賡郡諸生聰敏多智天啓庚申壬戌紅夷猖獗
賡時爲軍門贊畫以計靖之臺省交章敘功第一

予官不受

郭芝英字耀豪積善察東人明末以勦寇功授金門
遊擊狀貌英偉力舉千鈞敵望而畏之凡齎糧運
輸調遣進發多出其指畫晉光祿大夫太子太師
封忠奮伯

國朝

許盛字際斯號武巖康熙三年自海上率眾歸誠

授參將銜屯墾南贛時三藩蠢動閩粵荆湖諸寇
躡入江右破郡邑贛爲數省咽喉盛率屯丁前後

二十餘戰解寧都楊家寨富江等圍復石城萬安
赤和上猶龍泉等縣招撫僞將嚴自明戴順曾惟
龍等斬僞將陳昇凌之亮何鼎陳可韓大任等奪
回男婦無算以功 授南贛總兵晉秩右都督轉
左復勦崖石寨降其魁朱明 授拖沙喇哈番

予世職盛少遭亂失親骸至是匍匐悲號墟莽間
乃得其處二十七年移鎮襄陽道經武昌值夏逢
龍之亂幽閉城中身被四矢以計脫隨 大兵討
平之後爲言者所劾蒙 溫旨許盛矢志忠貞所

奏無據以原職出鎮宣府兩次出口隨征葛爾旦
以老乞歸捐貲三千八百金脩本邑文廟及明
倫堂鄉賢祠卒於家子廷瑞商邱知縣廷瑜通判
廷瑤常德知府

陳昂字英士少好擊劍有投石超距之能弱冠賈海

上熟識海島港門風潮險易總督姚啓聖將軍施
琅攻臺灣聞其名召與計事昂指畫南北風信阻
澳瞭若指掌琅善之置麾下參密畫及戰澎湖身
自搏鬪乘風破浪所當賊皆披靡敘功授蘇州

城守遊擊漕艘往來鼠竊不絕昂捐循有法兵民以輯尋調定海左軍兩遷至碣石總兵官擢廣東副都統到任卽疏劾天主教異端惑誘羣愚隱憂剴切又見沿海困於洋禁謂其子曰濱海民生業盡在番舶今禁絕之則土貨滯積生計無聊未有能悉此利害者卽知之又莫敢爲民請命我今疾作終此而不言則終莫達

天聽矣遺疏以聞商民稱便卒年六十八長子倫炯自有傳次子芳字名侯官碣石遊擊性嚴毅貌魁

漳能挽數石弓當爲把總時稔鹽捕以私鹽誣人
動輒破家產羅刑獄白於當道力除之調吳川遊
擊有造孩子酒者取胎孩投糟中吸其氣釀爲酒
孟值錢百吳川之孩羅其毒者無慮數十百人事
覺吳川令薄罰釋之芳曰此何如事不除其人而
絕其害非夫也立揭其事於兩府寘極刑其害遂
絕吳川父老傳其德不衰後以病免孫壩廣東大
鵬參將卽芳子也

吳楠字世喬石灣人康熙十九年應募義勇精曉水

務隨總兵吳英克復金廈兩島二十二年復從征
平澎臺加左都督任春江副將陞南澳總兵未任
卒

黃廷字甫朝號華明積善錦里人有大志具韜畧貌
魁梧初在鄭成功處掛偽將軍印畱守廈門及成
功亡投誠 國朝封慕義伯駐劄河南陽等處地
方長子而輝任湖廣衡永彬道次子而炯以軍功
陞江南安慶府副將

林莊雄積善岐陽人康熙十九年以把總隨師攻克

金厦兩島旋給署副將劄二十二年攻澎湖取花
嶼猫嶼草嶼八罩將軍澳南大嶼東西桔虎井福
盤嶼西嶼頭牛心灣內外暫時鷄籠嶼四角山風
櫃尾娘媽宮等三十六島議加功十九等 授左
都督兼拖沙布喇哈番以副將用

張正大噉人以平臺功績加左都督世襲雲騎尉歷
任金門鎮中軍兼署總兵官印務

魏平翔風爐前人儀表奇偉康熙十九年以平臺功
加左都督歷任南澳遊擊及臺灣南路參將所劄

之處恩威並著軍民咸得凡租稅入官者一切蠲免故人稱曰魏佛六十年陞廣西潯州副將卒於

節

王天貴翔風劉五店人素有膽力尤精水師康熙年閒嘗平岳及澎臺功加左都督補千總俸滿授浙江舟山遊擊時海賊猖獗目無舟師獨貴巡警所至賊膽怯嘗追賊遇風靜潮逆勢不相及乃下巨艦駕快艇急趨之賊爲所俘迄今舟山戰艦其械具利用皆貴之遺也時有商船遇劫其船戶及

舵手爲汎舟所獲囚獻提鎮貴力言非賊而船多
賊具難以抵釋貴乃舉家以保力白其寃然後得
免其弭盜安民類如此卒於官子大德以待衛
授崇明遊擊陞川沙參將

林宗泰貢生從姚啓聖平臺灣有功題補參議道
蔣煒澳頭人康熙閒隨大將軍施琅征臺灣以軍功

補蘇松中營參將

郭新字日民積善蔡東人少有大志究略鈐事戎馬

康親王稔其才略委署援勦右營守備旣而實

授守金門克復海壇南日平海湄洲崇武臭塗
及金廈等堡所至若有神助不戰而平靖海侯施
琅奉 命東征新爲前驅與劉國軒等戰於澎湖
奮力攻擊三十六嶼一時俱下乘風破浪入鹿耳
門鄭氏納款全臺蕩平琅表奏功次新列第三
授左都督子孫世襲拜拖喇布勒哈番

林永山積善龍嶼人號桐崖康熙年間出征湖南紅
苗議敘功加都司乾隆年以子應震教諭 贈修

職郎善吟咏有詩載全閩詩選

許忠在坊田厝人詔安寄籍由平臺功歷任同安營
遊擊子德修孫鍾岳俱歲貢

方劉進同禾里下方鄉人由平臺功加左都督任陝
西固原鎮副總兵

方長生縣城北門人康熙六十年平臺功歷任都司
劉執忠弱冠從戎具有勇略康熙十九年大將軍擢

爲遊擊隨征臺灣忠選練熟水性官兵三十二名
率先用命二十一年總督姚啓聖委赴淡水招撫

專平議敘 授海澄營軍民悅服

吳陞字源澤本姓黃爲總旗禦賊於果塘 援千總
又從征金門廈門澎湖臺灣以功陞陝西遊擊擢
廣東副將調瓊州自瓊崖歷銅鼓經七州洋四更
沙周遭三千里躬自巡視地方寧謐陞定海總兵
官設法捕盜奸宄屏跡晉浙江提督改福建陸路
雍正三年加太子少保明年卒 贈太子太保予
祭葬諡恪勤

魏國泰字德良翔風爐前人佳劉五店胸有膽略尤
精武藝弱冠充伍補水師提標把總康熙六十年

朱一貴倡亂國泰奉檄征勦多所追殺臺灣平山
把總歷陞洞庭副將潔已奉公兵民不擾嗣陞金
門鎮總兵官未赴任會貴州苗變又奉檄往鎮遠
協勦時苗勢猖獗嘗夜襲鎮遠國泰計兵丁在外
分防城中只有四十人乃預出城伏兵擊之苗望
幟卻走鎮遠之人賴以安焉尋苗後赴金門乾隆
元年以軍功 賜俸在金五載除番船陋規每歲
不下千金調碣石鎮凡有陋規亦革之後補廣東
右翼鎮未赴任而卒子文偉由廕生出補守備現

任廣東順德協副將

陳倫炯字次安都統昂長子爲諸生博通羣書尤畱

心諸外國夷情士俗及洋面針更海道著海國聞
見錄行於世召充宿衛長身玉立鬚眉整然 上

雅賞識之嘗扈從問及外夷情形對答瞭瞭悉與
圖藉脗合辛丑臺匪朱一貴倡亂奏曰烏合耳會
須刻日平也爲詳陳所以易平狀及平 賜賚有

差 授臺灣南路參將嚴紀律撫瘡痍恩威並用
民番以安晉安平副將憫辛丑死事者建五忠祠

祀許雲以下五人旋總鎮臺灣益勵已率屬時有
總鎮清廉補破靴之謠歷調高雷廉蘇松狼山諸
鎮皆有聲而在蘇松則爲崇明人廓清數十年匿
糧積弊尤卓卓可紀乾隆壬戌提督兩浙軍務五
載解組歸卒年六十有四

胡貴字爾慎號潔峯少有智略習韜鈴精騎射留心
水務風雲氣候港汊險易靡不周知由行伍授
水師把總千總擢守備陞南澳遊擊玉環參將聞

安副將蘇松潮州瓊州總兵廣東提督調浙江二

載仍調廣東歷官三十餘年草陋規勤訓練嚴巡
哨慎舉劾於救災弭盜尤惓惓加意在蘇松督運
漕糧十萬石來閩賑飢至溫舟遇颶風波濤拍天
貴望空禱風旋息回崇明是年七月狂飈陡發海
水驟漲漂沒廬舍人口盈萬亟商崇明令發賑令
以未辨爲辭貴曰難民死在煩刻寧能俟報有譴
吾自當之卽開倉賑濟又慮邑員少勢難周遍令
標屬四十餘員協同分賑衆有難色毅然曰若等
非以衛民乎倘賑有不周因而致變若等豈能免

患請撥帑金十八萬倉穀二十八萬並截漕接賑
民賴以安在粵東值逆匪王亮臣等倡亂飛檄邊
界預截逃路分遣部將往增城虎門華峯藍汾二
山諸要地嚴行搜緝而增城在萬山中尤緊要亟
勒兵策馬馳鎮之適制府阿里袞亦至分道進搜
一從華峯入一從藍汾入諸逆次第捕獲積至二
百餘名復與阿里袞籌善後策事 聞加秋及自
浙再調廣東卒於官 賜祭葬加 贈一級諡勤

愨

林君陞字聖躋號敬亭由行伍授偏裨康熙六十

年奉調帶兵押餉赴臺灣並查臺地情形爲上官

所器擢黃巖鎮遊擊雍正四年以保舉授定海

總兵至則嚴守禦飭巡邏沿海救寧壬子秋大饑

軍民乏食多方設法全活甚衆乾隆二年調鎮汀

州越二年調碭石旋調金門復值歲荒籌畫接濟

軍民以甦七年以都督同知授廣東提督迎母

就養丁內艱服闕暫補臺灣總兵未半載仍授

廣東提督續調福建水師提督復奉調廣東提督

凡三至粵兵民稱慶甫半年調江南提督駕馭弁
兵威以法撫以恩大江南北晏然寧謐公暇縱觀
書史臨池得草書三昧或作大字高徑丈喜吟咏
自成一家言旁及星命之學推算入神尤敦倫誼
撫姪如子內外親族急難喪葬傾貲助之卒於官
年六十八諡溫僖所著有自遣偶草及舟師繩墨
救荒備覽等書子植以廕生 擢大理寺右寺丞

高華松翔風劉五店人慷慨仗義明於機略康熙五
十八年由千總拔藍翎侍衛歷陞崖州參將整飭

營規邊地無虞崖多煙瘴襲人輒病松按氣候爲

藥丸散給軍民咸知避忌病者得免乾隆七年陞

春江協副將歷署廣東總兵卒於官子德明任廣

東順德遊擊姪孫膺振任廣東左翼鎮左營遊擊

陳壩字仲篋安仁里人遊擊芳子以伯倫炯移廕補

福建水師提標左軍守備陞金門遊擊尋調臺協

中軍俸滿授烽火門參將調東大鵬營以荐陞

香山副將地當廣海門戶西南諸番舶輳集其間

而澳門紅夷室家雜處撫綏爲難其外零丁諸洋

汪洋無際奸民哨掠聚散靡常莫可踪跡壩內克
彈壁外歷巡緝以故夷民均安洋盜相戒不入其
境及巨盜曾德度等案發沿海文武多被議而香
山獨晏然無事亦其效也壩生長將門雙目炯炯
有光善騎射而性溫雅所至與諸有司和衷相濟
軍民胥得歷署左翼碣石總鎮有祖父之風年五
十三卒於官未竟其用論者惜之

方文柱在坊人貴州撫標左營守備從總督張廣泗
征苗有功加陞遊擊未任而卒子從仁乾隆十年

蔭監生

柯連英有智勇康熙間以熟識臺地情形從征臺平
任南路千總駐下淡水彈壓溪東旋陞守備分駐
鳳彈地當要衝無土堡連英募工種刺竹周圍三
匝犬牙相錯五年而吳福生作亂圍攻鳳彈竟不
能入民頌其功雍正六年溪東有山名山猪毛其
中皆傀儡生番時出焚掠民苦之時連英已護叅
軍事請於帥府率師深入搗其巢擒番黨二十人
番懼不敢出至今無山猪毛番患臺人感之後陞

廣東左翼鎮中軍以病告卒於家

吳必達字通卿號碧涯雍正庚戌科武進士由守備歷陞廣東提督調福建水師提督居官三十餘年草除陋規整飭營伍所至有廉聲軍民悅服

蔡攀龍金門平林人由行伍陞守備乾隆五十二年臺匪林爽文竊發攀龍從征屢著勞績 投狼山總兵嘉慶三年卒於官

葉時茂字允豐號得溪嶺下人任瑤江乾隆癸未會

元探花及第由侍衛歷任廣西

州遊擊融懷叅

將新大副將居官清廉兵民悅服生平好吟咏著
有得溪詩集

卷二